

**MESYUARAT PERTAMA, PENGGAL KEDUA  
PARLIMEN KEEMPAT BELAS**

**2019**

**HARI SELASA : 2 APRIL 2019**

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : TUAN SYED IBRAHIM BIN SYED NOH**

**TARIKH : 2 APRIL 2019 (SELASA)**

Tuan Syed Ibrahim bin Syed Noh [ Ledang ] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah perbezaan kaedah atau mekanisme pelaksanaan inisiatif Kedai Ekonomi Pengguna (i-KeeP) berbanding Kedai Rakyat 1 Malaysia (KR1M) dan berapakah jumlah sasaran pelaksanaan i-KeeP ini menjelang tahun 2020.

**JAWAPAN**

**Tuan Yang Di-Pertua,**

Inisiatif Kedai Ekonomi Pengguna (i-KeeP) merupakan satu inisiatif baharu Kerajaan dalam usaha menangani isu kos sara hidup rakyat dengan menawarkan barang keperluan harian pada harga yang berpatutan. **i-KeeP telah dilancarkan pada 28 November 2018.** Selepas empat bulan program ini dilancarkan sejumlah **304 premis i-KeeP** telah diwujudkan dengan penyertaan daripada 6 buah syarikat sebagai rakan strategik i-KeeP. Daripada 304 outlet tersebut **113 outlet i-KeeP terletak di kawasan bandar manakala 191 outlet i-KeeP terletak di kawasan luar bandar.** Menjelang **tahun 2020, Kerajaan berhasrat untuk mengembangkan premis i-KeeP sehingga 500 premis.** Pelaksanaan i-KeeP digerakkan melalui kerjasama strategik Kerajaan dengan syarikat peruncitan yang berkaliber dan berkeupayaan tanpa bantuan kewangan daripada pihak Kerajaan. Pihak Kerajaan terbuka kepada mana-mana pihak yang berminat untuk menyertai i-KeeP

**Tuan Yang Di-Pertua,**

Selain itu, premis **i-KeeP tidak memfokuskan kepada pembangunan kedai fizikal yang khusus seperti KR1M** dahulu. Pasaraya atau kedai yang menyertai i-KeeP ialah pasar raya atau outlet kedai sedia ada. Pemilik outlet atau perniagaan yang terlibat dengan i-KeeP itu sendiri yang menjalankan perniagaan i-KeeP seperti operasi biasa premis mereka. Logo i-KeeP akan dipaparkan dalam bentuk papan tanda dan pelekat (*sticker*) serta diletakkan secara berasingan daripada papan tanda premis perniagaan runcit yang terlibat. Ia bagi tujuan untuk menunjukkan kepada pengguna bahawa outlet tersebut terlibat dalam program i-KeeP dan penglibatan ini tidak menukar sama ada reka bentuk, warna serta ciri-ciri lain yang menjadi identiti asal premis-premis tersebut sebelum ini. Konsep ini dikenali sebagai kendalian pemilik (*owner-operator*) dan penjenamaan bersama (*co-branding*). Konsep perniagaan ini lebih berdaya maju dan ‘*sustainable*’.

**Tumpuan barang** yang dijual melalui i-KeeP adalah barang keperluan asas seperti gula, minyak masak, tepung gandum dan beras. Selain itu, i-KeeP juga menjual barang keperluan harian yang berjenama dengan mengekalkan pembungkusan barang jenama tersebut pada harga yang berpatutan dan munasabah. Sehingga kini melalui kerjasama rakan strategik i-KeeP, **197 jenis barang keperluan harian seperti makanan dalam tin, krimer manis, krimer sejat, susu, sos, makanan dan minuman, serbuk koko bermalt dan lain-lain yang berjenama** telah disenaraikan sebagai barang i-KeeP. Penentuan jenis barang i-KeeP, dilaksanakan melalui **tinjauan (survey) barang** khas kepada pengguna dan input data jualan seratus barang tertinggi daripada rakan strategik i-KeeP. Penambahbaikkan jenis barang i-KeeP akan dilaksanakan secara berterusan oleh pihak Kementerian agar menepati keperluan pengguna Malaysia.

Selain itu, **penjimatan yang pengguna dapat hasil daripada membeli barang di outlet i-KeeP adalah di antara dua (2) peratus hingga dua puluh (20) peratus**. Sebagai contoh, ada satu jenama serbuk minuman coklat bermalt yang biasanya dijual di kedai runcit mengikut harga pasaran (*Recommended Retail Price [RRP]*) dengan berat satu kilogram (kg) berharga Ringgit Malaysia (RM) 22.00 namun di outlet i-KeeP hanya dijual tidak melebihi daripada RM17.80 iaitu lebih jimat sebanyak RM4.20 (penjimatan 19 peratus).

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : DATO' HAJI CHE ABDULLAH  
BIN MAT NAWI [ TUMPAT ]**

**TARIKH : 2 APRIL 2019 [ SELASA ]**

**SOALAN NO. 2**

Minta **MENTERI PERUMAHAN DAN KERAJAAN TEMPATAN** menyatakan apakah langkah yang dilakukan bagi menghapuskan sisa plastik import dari kilang haram yang dilihat menjaskan alam sekitar.

**JAWAPAN**

Tuan Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) telah melaksanakan operasi bersepadu bersama dengan beberapa agensi kerajaan seperti Tenaga Nasional Berhad (TNB) dan Syarikat Bekalan Air Selangor Sdn. Bhd. (SYABAS), Jabatan Alam Sekitar (JAS) dan Jabatan Keselamatan dan Kesihatan Pekerjaan (JKKP) untuk membanteras pengoperasian sisa plastik import dari kilang haram yang menjaskan alam sekitar.

2. Operasi bersepadu tersebut bertujuan untuk memastikan tindakan dapat diambil secara menyeluruh berdasarkan peruntukan undang-undang di bawah agensi masing-masing. Sebagai contoh KPKT telah mengarahkan Majlis Daerah Kuala Langat (MDKL) untuk menutup 33 kilang plastik tidak berlesen secara berperingkat dan stok sisa plastik di premis tersebut telah dipindahkan ke kilang plastik yang berlesen. Di

samping itu, Pejabat Tanah dan Galian Daerah Kuala Langat juga telah mengeluarkan Notis 7A kepada pemilik tanah yang menjadikan tanah miliknya kawasan penyimpanan sisa plastik import secara haram serta mengarahkannya dipindahkan ke lokasi yang dibenarkan.

3. Untuk makluman Yang Berhormat, operasi penguatkuasaan juga dilaksanakan di pintu masuk Malaysia melalui kerjasama dengan Jabatan Kastam Diraja Malaysia iaitu untuk mengetatkan pemeriksaan dagangan sisa plastik yang dibawa masuk terutamanya di bawah kod HS 3915. Polisi KPKT juga menetapkan dagangan perlu dihantar semula ke negara asal oleh pengimport jika didapati tidak mempunyai permit yang sah.

4. Sekiranya sisa plastik import dari kilang haram adalah bersih, KPKT akan meminta Pihak Berkuasa Tempatan (PBT) untuk mengarahkan pemilik kilang untuk menjual atau melelong kepada syarikat yang mempunyai lesen import (AP) sisa plastik yang sah daripada Jabatan Pengurusan Sisa Pepejal Negara (JPSPN) untuk diproses menjadi produk akhir seperti resin dan *flakes*. Syarikat yang mempunyai lesen import (AP) ini secara amnya perlu mematuhi kesemua syarat-syarat baharu yang telah ditetapkan oleh KPKT seperti mendapat kelulusan pematuhan daripada JAS di bawah Akta Kualiti Alam Sekeliling (Akta 127) 1974.

5. Bagi sisa plastik import dari kilang haram yang kotor pula, pemilik akan diminta untuk melupuskannya dan diproses menjadi *Processed Engineered Fuel* (PEF) iaitu bahan bakar di kilang simen.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : DATO' SERI HAJI IDRIS BIN JUSOH [BESUT]**

**TARIKH : 2 APRIL 2019 (SELASA)**

**SOALAN NO. 4**

Minta **MENTERI KESIHATAN** menyatakan status terkini ke atas usaha menaik taraf Hospital Besut sebagai hospital pakar, sebagaimana diumumkan oleh pihak kerajaan pada Ogos tahun lalu.

**JAWAPAN**

**Yang di-Pertua,**

Di dalam usaha Kementerian Kesihatan Malaysia (KKM) untuk menjadikan Hospital Besut sebagai sebuah hospital berpakar serta menaiktaraf perkhidmatan kesihatan yang diberikan , sukacita dimaklumkan bahawa KKM telahpun menempatkan seorang doktor pakar residen ke Hospital Besut di dalam bidang psikiatri. Di samping itu juga, di bawah inisiatif hospital kluster, Hospital Besut juga menerima perkhidmatan pakar tetap dari Hospital Sultanah Nur Zahirah (*lead hospital*) di dalam bidang perubatan am dan pembedahan am.

Selain daripada perkhidmatan kepakaran tersebut, hospital ini juga mendapat perkhidmatan lawatan pakar secara berkala di dalam 13 bidang kepakaran dan subkepakaran iaitu:

- i. oftalmologi: seminggu sekali;
- ii. obstetrik dan ginekologi (3 kali sebulan);
- iii. pediatrik (2 kali sebulan);
- iv. otorinolaringologi (2 kali sebulan);
- v. radiologi (2-3 kali sebulan);
- vi. ortopedik (sebulan sekali);

- vii. kardiologi (sebulan sekali);
- viii. anestesiologi (sebulan sekali);
- ix. hematologi (setiap 3 bulan);
- x. rheumatologi (setiap 3 bulan);
- xi. nefrologi (setiap 3 bulan);
- xii. respiratori (setiap 3 bulan); dan
- xiii. rehabilitasi (setiap 3 bulan).

Hospital Besut juga telah diluluskan peruntukan di bawah Rancangan Malaysia untuk menaiktaraf wad kebergantungan tinggi (*High dependency ward*) serta perolehan peralatan perubatan dan bukan perubatan sebanyak RM6.65 juta sebagai salah satu langkah untuk menjadikan Hospital Besut sebagai sebuah hospital berpakar. KKM memang sentiasa berusaha untuk meningkatkan mutu penyampaian perkhidmatan perubatan yang diberikan.

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : DATO' SRI IKMAL HISHAM BIN ABDUL AZIZ [TANAH MERAH]**

**TARIKH : 2 APRIL 2019**

**SOALAN : 5**

**Dato' Sri Ikmal Hisham bin Abdul Aziz [ Tanah Merah ]** minta **PERDANA MENTERI** menyatakan jumlah penjawat awam yang ditahan dan didakwa sepanjang 2018 kerana rasuah.

**JAWAPAN:** **YB TUAN MOHAMED HANIPA BIN MAIDIN**  
**TIMBALAN MENTERI DI JABATAN PERDANA**  
**MENTERI**

Yang Berhormat,

Untuk makluman Yang Berhormat Tanah Merah, jumlah tangkapan yang melibatkan penjawat awam bagi tahun 2018 adalah seramai 418 orang. Dalam tempoh yang sama seramai 140 orang telah dituduh di mahkamah atas kesalahan-kesalahan dibawah bidang kuasa suruhanjaya ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : Dato' Dr. Noraini Ahmad [Parit Sulong]**

**TARIKH SOALAN : 2 APRIL 2019 (SELASA)**

**SOALAN NO. 6**

Minta **MENTERI PEMBANGUNAN USAHAWAN** menyatakan jumlah Perusahaan Kecil dan Sederhana (PKS) yang telah berjaya dianugerahkan pensijilan halal sejak pengumuman Bajet 2019 berkaitan RM100 juta dana untuk PKS bagi merancakkan sektor halal dan bagaimana kejayaan ini boleh memberi implikasi positif kepada industri halal.

**JAWAPAN**

Tuan Yang Dipertua,

1. Berdasarkan maklum balas daripada Jabatan Kemajuan Islam Malaysia, untuk tempoh 1 November 2018 – 28 Februari 2019, permohonan yang diterima untuk mendapatkan Persijilan Halal Malaysia adalah sebanyak 3,268 buah syarikat dan daripada jumlah tersebut, sebanyak 1,624 syarikat telah diberi pengesahan Persijilan Halal Malaysia.
2. Untuk makluman ahli-ahli Yang Berhormat, peruntukan RM100 juta yang disediakan di bawah Belanjawan 2019 adalah diperuntukkan kepada Kementerian Kewangan (MOF), Kementerian Hal Ehwal Ekonomi (MEA), Kementerian Pertanian (MOA) dan Jabatan Kemajuan Islam Malaysia (JAKIM) untuk pelaksanaan projek pembangunan Hab Halal dan juga program pembangunan industri halal.

3. Kementerian Pembangunan Usahawan (MED) tidak menerima peruntukan khas di bawah Belanjawan 2019 berhubung pembangunan industri halal. Namun begitu, MED telah melaksana beberapa program bagi membantu perkembangan industri halal di negara ini, antaranya:

**(a) Program Peningkatan Enterpris Bumiputera (BEEP)**

Bertujuan meningkatkan daya saing PKS Bumiputera menerusi bantuan bersepadu yang meliputi persijilan halal, khidmat nasihat, latihan dan sokongan kewangan. Program ini dilaksanakan dengan kerjasama Kerajaan Negeri dan bantuan kewangan yang diberikan adalah dalam bentuk geran bersamaan. Untuk tempoh 2014 sehingga 31 Januari 2019, sejumlah 1,995 kelulusan telah diberikan melibatkan geran berjumlah RM189 juta.

**(b) Business Accelerator Program (BAP)**

Inisiatif yang dilaksana bagi membantu PKS memperkembangkan perniagaan dengan menyediakan bantuan bersepadu dalam bentuk penilaian syarikat, khidmat nasihat perniagaan, tambah baik aktiviti dan bantuan kewangan. Sebanyak 21 PKS telah berjaya memperoleh sijil halal melibatkan implikasi kewangan sebanyak RM1.9 juta.

**(c) Program Showcase Satu Daerah Satu Industri (SDSI)**

Di bawah MED, program SDSI kini lebih bersasar ke arah memasarkan produk halal PKS dan mikro PKS serta koperasi di peringkat daerah dan negeri ke pasaran yang lebih luas melalui sesi pemasaran perniagaan yang telah diadakan dengan syarikat peruncitan tempatan dan pasar raya besar. Dua siri SDSI telah dilaksanakan setakat ini iaitu SDSI Perak pada 19-20 Januari 2019 melibatkan 52 usahawan (jualan sebanyak RM4.4. juta) dan SDSI Terengganu (RM6.9 juta) pada 15-16 Februari 2019 melibatkan 96 usahawan. Siri SDSI ini akan diteruskan ke negeri-negeri lain bagi membantu mempromosi produk-produk IKS di setiap negeri.

**(d) Ekspo Halal Malaysia 2019**

Ekspo HALAL Malaysia 2019 telah diadakan buat julung kalinya pada 24 - 26 Januari 2019 khusus untuk meneroka pasaran Jepun sempena Sukan Olimpik Jepun 2020. Sepanjang tiga (3) hari acara ini berlangsung, sebanyak 223 Sesi Pemadanan Perniagaan telah direkodkan dengan 144 PKS telah mengambil bahagian yang menjana potensi jualan sebanyak RM135 juta.

**Tuan Yang Dipertua,**

4. MED juga telah dilantik untuk menganggotai Majlis Halal Malaysia yang akan bertanggungjawab untuk membangun usahawan yang berdaya saing dan berdaya maju dalam industri Halal. Ini dilaksana MED bersama-sama dengan agensi lain seperti MEA, JAKIM dan lain-lain menerusi inisiatif yang telah digariskan di bawah kerangka kerja Pelan Induk Industri Halal. Bagi merangsang perkembangan industri halal di negara ini, fokus MED kini adalah pembangunan sumber bahan utama dalam penghasilan produk-produk halal bagi meningkatkan kepelbagaiannya produk halal usahawan Bumiputera.

Antara inisiatif yang sedang diusahakan MED ialah untuk menghasilkan industri pembuatan gelatin halal di Malaysia dengan penglibatan sektor swasta. Perbincangan awal telah diadakan dengan Jabatan Kemajuan Islam Malaysia (JAKIM) dan beberapa negara pengekspor lembu terbesar bagi merealisasikan hasrat ini dengan kadar segera.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**

---

**PERTANYAAN : LISAN**

**DARIPADA : TUAN AKMAL NASRULLAH BIN MOHD.  
NASIR [ JOHOR BAHRU ]**

**TARIKH : 2.4.2019 (SELASA)**

**SOALAN NO. 7**

**Tuan Akmal Nasrullah bin Mohd. Nasir [ Johor Bahru ]** minta **MENTERI PENDIDIKAN** menyatakan status terkini kajian yang dijalankan dalam usaha untuk meningkatkan taraf sijil Pendidikan dan Latihan Teknikal dan Vokasional (TVET). Apakah pelan tindakan segera yang telah dilaksanakan oleh Kementerian sejak awal tahun 2019.

**JAWAPAN**

Tuan Yang di-Pertua,

Kementerian Pendidikan Malaysia (KPM) telah dan sedang berusaha mengemudi semula pandangan sarwa masyarakat terhadap kebolehan manusiaawi itu sendiri. Manusia mempunyai bakat dan kebolehan yang berbeza berdasarkan lahiriah, ada yang mempunyai kecenderungan dalam bidang akademik, ada yang mempunyai kecenderungan dalam bidang sukan, kesenian dan sebagainya. TVET memberi peluang kepada bidang selain akademik untuk menyumbang kepada negara dan juga kepada masyarakat manusiaawi. Pencapaian akademik bukanlah kayu ukur tunggal dalam menentukan kejayaan seseorang.

Untuk makluman Ahli Yang Berhormat Johor Bahru, hasil Laporan Interim Jawatankuasa Pemerkasaan TVET yang disediakan pada awal Januari 2019, telah mencadangkan beberapa inisiatif. Ada diantara inisiatif tersebut yang telah pun berjalan, ada yang sedang berjalan dan ada yang akan dimulakan. Antara inisiatif yang telah diambil tindakan oleh KPM adalah seperti berikut:

- a) Penubuhan Jawatankuasa *Taskforce Khas Hala Tuju Kolej Vokasional* yang diketuai oleh Datuk Boonler Somchit sebagai Penasihat JK *Taskforce* dalam memberi nasihat dan cadangan pemerkasaan Kolej Vokasional terutamanya dari aspek kualiti, pengiktirafan dan pentaulahan program dari Agensi Kelayakan Malaysia (MQA) dan Jabatan Pembangunan Kemahiran (JPK).
- b) Kelulusan Memorandum Jemaah Menteri (MJM) Pelaksanaan Sistem Jaminan Kualiti Tunggal Pendidikan dan Latihan Teknikal dan Vokasional pada 30 Januari 2019 buat julung kalinya dalam sejarah Malaysia kita ada sistem jaminan kualiti tunggal pendidikan TVET yang akan diguna pakai oleh MQA dan JPK dalam mengakreditasi program TVET yang ditawarkan oleh institusi TVET awam dan swasta berdasarkan Kerangka Kelayakan Malaysia (MQF). Strategi ini membolehkan mobiliti pelajar antara semua institusi TVET di seluruh Malaysia.

**SOALAN NO : 7**

- c) Perkongsian sumber pendidikan antara institusi TVET KPM bagi tujuan pengoptimuman sumber agar segala kelengkapan, kepakaran boleh dikongsi bersama-sama oleh semua institusi TVET.
- d) Mengadakan Mesyuarat Jawatankuasa Pemeriksaan TVET (JKPTVET) – Teknikal Bersama Semua Kementerian Penyedia TVET bagi membincangkan kaedah penyelesaian terhadap cadangan yang dikemukakan dan menerima maklum balas daripada kementerian, agensi dan industri yang hadir.
- e) *Premier TVET Talk* bersama industri akan diadakan pada 4 April 2019 bagi mendapatkan segala input dan pandangan daripada industri untuk memperkasakan TVET.
- f) Mengadakan *Town Hall Meeting* dengan melibatkan semua pemegang taruh untuk mendapatkan input dan maklum balas berkaitan TVET negara.

Sekian, terima kasih

RJM 106

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SRI HAJI TAJUDDIN BIN ABDUL  
RAHMAN  
[PASIR SALAK]**

**TARIKH : 2 APRIL 2019 (SELASA)**

**SOALAN NO. 8**

Minta **MENTERI HAL EHWAL EKONOMI** menyatakan mengapakah bantuan sara hidup peserta FELCRA di potong.

**JAWAPAN**

Yang di-Pertua,

1. Untuk makluman Yang Berhormat, **pembiayaan sara hidup adalah merupakan pinjaman** kepada peserta-peserta bertujuan membantu perbelanjaan bulanan apabila projek mereka tidak mempunyai hasil semasa program tanam semula. Pembiayaan sara hidup yang diterima oleh peserta-peserta ini diperolehi daripada dua sumber utama iaitu:
  - (i) Sumber tabungan peserta yang diperolehi daripada Tabung Tanam Semula (TTS), Bantuan Tanam Semula RISDA (BTSR) dan bantuan MPOB.
  - (ii) Sumber pinjaman daripada FELCRA di mana FELCRA menggunakan sumber dalamannya sendiri iaitu pada kadar RM70/ekar/bulan selama 4 tahun bagi tanaman sawit dan 6 tahun bagi tanaman getah, **dalam bentuk pinjaman yang perlu dibayar balik oleh peserta.**
2. Bermula bulan Ogos 2018, FELCRA telah mengambil langkah menangguhkan sementara pinjaman sara hidup kepada peserta-peserta disebabkan oleh kedudukan semasa kewangan Syarikat yang lemah. Ini adalah ekoran kejatuhan harga komoditi dan cabaran isu legasi yang diwarisi daripada Pengurusan terdahulu.
3. Penangguhan secara sementara ini hanyalah bagi pinjaman yang menggunakan sumber dalaman FELCRA sahaja manakala bayaran sara hidup yang menggunakan tabungan peserta seperti Bantuan Tanam Semula RISDA (BTSR), dibayar terus kepada peserta-peserta.

4. Memandangkan FELCRA kini berhadapan dengan keadaan kewangan yang sangat serius, maka FELCRA sentiasa berusaha keras untuk mendapatkan pinjaman daripada Kerajaan dan atau institusi-institusi kewangan bagi membiayai pinjaman sara hidup. FELCRA yakin perkara ini akan dapat diselesaikan dalam masa terdekat.
5. Lembaga Pengarah dan Pengurusan baharu yang telah dilantik dalam bulan Oktober 2018 telah menggariskan enam (6) arah tuju strategik yang perlu dihayati dan difahami sepenuhnya oleh semua lapisan warga kerja FELCRA iaitu:
  - (i) *Reinvent (company's entity)*  
Meletakkan aras baharu entiti syarikat sebagai sebuah *social enterprise* berteraskan perladangan.
  - (ii) *Reengineer (core business efficiency)*  
Memperkuuhkan operasi ladang dan kilang.
  - (iii) *Reignite (employees' spirit)*  
Menyemarakkan semangat kerja staf menerusi penerapan nilai-nilai high performance, integritl, disiplin dan tadbir urus berkesan.
  - (iv) *Rebuild (settlers' trust)*  
Memperkasakan kepercayaan peserta dan masyarakat umum.
  - (v) *Revisit (new system applications)*  
Menambah baik sistem pengurusan, standard operating procedures (SOP), manual dan office automation.
  - (vi) *Restructure (management team)*  
Menggembung pasukan kerja baru berpaksikan pengurusan kanan dan pengurusan operasi.

**NO SOALAN : 8**

6. Dengan usaha pelaksanaan ini, kami yakin ianya dapat mengembalikan FELCRA Berhad kepada tujuan asalnya demi manfaat dan kesejahteraan peserta-peserta FELCRA.

Sekian, terima kasih.

Kementerian Hal Ehwal Ekonomi

2 April 2019

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**TARIKH : 2 APRIL 2019**

**DARIPADA : Tuan Chan Foong Hin [ Kota Kinabalu]**

**SOALAN : 9**

**Tuan Chan Foong Hin [ Kota Kinabalu]** minta **PERDANA MENTERI** menyatakan Kerajaan bercadang :

- (a) Artikel 10 Perlembagaan Persekutuan dipinda agar undang-undang anti lompat parti adalah dibenarkan ; dan
- (b) Artikel 48 (6) Perlembagaan Persekutuan dihapuskan supaya seseorang wakil rakyat tidak dilucut hak untuk bertanding semula di kawasannya selama lima tahun jikalau meletak jawatan sebagai wakil rakyat.

**JAWAPAN: YB TUAN MOHAMED HANIPA BIN MAIDIN  
TIMBALAN MENTERI DI JABATAN PERDANA MENTERI**

Tuan Yang di-Pertua,

1. Perenggan (c) Fasal (1) Perkara 10 Perlembagaan Persekutuan memperuntukkan hak kepada semua warganegara untuk membentuk persatuan seperti yang berikut:

***“Kebebasan bercakap, berhimpun dan berpersatuan.***

***10. (1) Tertakluk kepada Fasal (2), (3) dan (4)—***

- (a) ...
- (b) ...
- (c) *semua warganegara berhak untuk membentuk Persatuan.”*

2. Hak untuk membentuk persatuan yang dijamin di bawah perenggan (c) Fasal (1) Perkara 10 Perlembagaan Persekutuan turut merangkumi hak untuk menyertai atau tidak menyertai persatuan dan juga hak untuk meletak jawatan dalam sesuatu persatuan. Berdasarkan keputusan Mahkamah Agong dalam kes **Dewan Undangan Negeri Kelantan & Anor v. Nordin Salleh & Anor [1992] 1 CLJ (Rep) 72 (SC)**, telah diputuskan bahawa peruntukan undang-undang mengenai larangan melompat parti merupakan sekatan kepada hak untuk membentuk persatuan di bawah perenggan (c) Fasal (1) Perkara 10 Perlembagaan Persekutuan.

3. Pada 16 Oktober 2018, Menteri di Jabatan Perdana Menteri telah memberikan jawapan kepada pertanyaan lisan oleh Yang Berhormat Kepong di Dewan Rakyat berkenaan isu yang sama. Jawapan Menteri di Jabatan Perdana Menteri adalah seperti yang berikut:

*“Untuk makluman Ahli Yang Berhormat, Kerajaan sentiasa terbuka terhadap cadangan penambahbaikan berkaitan penggubalan undang-undang daripada pelbagai pihak. Berhubung dengan cadangan untuk menggubal Undang-Undang Anti Lompat Parti, Suruhanjaya Pilihan Raya berpandangan bahawa buat masa ini, setiap warganegara dijamin hak untuk bebas berpersatuan. Ini adalah selaras dengan Perkara 10(1)(c) Perlembagaan Persekutuan. Hak untuk bebas berpersatuan ini turut telah dibincangkan dalam keputusan Mahkamah Persekutuan dalam kes Dewan Undangan Negeri Kelantan & Anor. V Nordin bin Salleh & Anor [1992] 1 CLJ Rep masih terpakai.”.*

4. Namun, sekiranya Kerajaan berhasrat untuk membuat apa-apa undang-undang untuk menyekat tindakan melompat parti, undang-undang tersebut hendaklah dibuat oleh Parlimen dan tertakluk kepada sekatan yang dibenarkan di bawah perenggan (c) Fasal (2) Perkara 10 Perlembagaan Persekutuan seperti yang berikut:

***“Kebebasan bercakap, berhimpun dan berpersatuan.***

***10. (2) Parlimen boleh melalui undang-undang mengenakan—***

***(a) ...***

- (b) ...
- (c) *ke atas hak yang diberikan oleh perenggan (c) Fasal (1), apa-apa sekatan yang didapatinya perlu atau suai manfaat demi kepentingan keselamatan Persekutuan atau mana-mana bahagiannya, ketenteraman awam atau prinsip moral.”.*

5. Walau bagaimanapun, sekiranya undang-undang larangan melompat parti dihasratkan untuk menghilangkan kelayakan seseorang ahli Parlimen dan ahli Dewan Undangan Negeri dan kerusinya akan dikosongkan jika beliau melompat parti, undang-undang tersebut adalah tidak selaras dengan Perkara 48 Perlembagaan Persekutuan dan seksyen 6 Bahagian I Jadual Kelapan Perlembagaan Persekutuan kerana Fasal (1) Perkara 48 Perlembagaan Persekutuan dan seksyen 6 Bahagian I Jadual Kelapan Perlembagaan Persekutuan tidak memperuntukkan tindakan melompat parti akan menyebabkan seseorang ahli Parlimen dan ahli Dewan Undangan Negeri hilang kelayakan untuk menjadi mana-mana ahli Parlimen dan ahli Dewan Undangan Negeri.

6. Berhubung dengan cadangan untuk menghapuskan Fasal (6) Perkara 48 Perlembagaan Persekutuan pula, Fasal (6) Perkara 48 Perlembagaan Persekutuan ini dimasukkan melalui Akta Perlembagaan Persekutuan (Pindaan) 1990 [Akta A767]. Semasa pembentangan pindaan tersebut di Dewan Rakyat pada 14 Mac 1990 (di muka surat 39 Penyata Rasmi Dewan Rakyat), Dato' Seri Dr. Mahathir bin Mohamad (Perdana Menteri pada ketika itu) telah menjelaskan bahawa tujuan pindaan tersebut adalah seperti yang berikut:

*“Tuan Yang di-Pertua, pada masa ini tidak ada peruntukan yang menghalang seseorang ahli Dewan Rakyat atau Ahli Dewan Undangan Negeri meletakkan jawatan dan kemudian bertanding semula dalam pilihan raya yang diadakan bagi kerusi yang dikosongkannya itu. Ketiadaan halangan ini memungkinkan seseorang ahli Dewan Rakyat atau Ahli Dewan Undangan Negeri meletakkan jawatan dan bertanding semula bagi kerusi yang sama semata-mata untuk menguji atau membuktikan popularitinya. Apabila ini dilakukan, maka banyaklah masa, tenaga dan wang yang terbuang sedangkan rakyat dan negara tidak mendapat apa-apa faedah daripadanya.”.*

7. Oleh yang demikian, apa-apa cadangan untuk menghapuskan Fasal (6) Perkara 48 Perlembagaan Persekutuan adalah merupakan suatu perkara dasar yang hendaklah dipertimbangkan oleh Kerajaan dengan berhati-hati dengan mengambil kira tujuan asal Fasal (6) Perkara 48 Perlembagaan Persekutuan dimasukkan ke dalam Perlembagaan Persekutuan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KEDUA, PENGGAL PERTAMA  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : TUAN AHMAD MARZUK BIN SHAARY  
[PENGKALAN CHEPA]**

**TARIKH : 2 APRIL 2019 (SELASA)**

**SOALAN NO. 10**

Minta **MENTERI PENGANGKUTAN** menyatakan justifikasi dasar tiada tawaran diskaun terhadap mana-mana notis kompaun yang dikeluarkan Jabatan Pengangkutan Jalan (JPJ).

**JAWAPAN**

Yang di-Pertua,

1. Untuk makluman Yang Berhormat, Kementerian Pengangkutan Malaysia melalui Jabatan Pengangkutan Jalan telah menetapkan dasar bahawa semua notis saman yang dikeluarkan oleh JPJ terhadap mana-mana kesalahan di bawah Akta Pengangkutan Jalan 1987 yang boleh dikompaun adalah tidak boleh dikurangkan atau diskaun.
2. Justifikasi dasar tiada tawaran diskaun terhadap notis saman yang dikeluarkan oleh JPJ adalah:
  - a. Setiap orang kena saman (OKS) yang melakukan kesalahan lalu lintas atau yang melanggar Akta Pengangkutan Jalan 1987 hendaklah bertanggungjawap terhadap kesalahan yang dilakukan;
  - b. Mendidik pengguna jalan raya supaya tidak melakukan kesalahan lalu lintas berulang dan mematuhi terhadap setiap undang-undang yang sedang berkuatkuasa untuk mengurangkan kemalangan jalan raya; dan
  - c. Memberi tawaran diskaun terhadap setiap notis saman yang dikeluarkan akan melahirkan pengguna jalan raya yang tidak takut untuk melakukan kesalahan jalan raya dan negara kita akan gagal membentuk pengguna jalan raya yang menghormati undang-undang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**

---

**PERTANYAAN : LISAN**

**DARIPADA : DATO' DR. MOHD KHAIRUDDIN BIN AMAN  
RAZALI [ KUALA NERUS ]**

**TARIKH : 2.4.2019 (SELASA)**

**SOALAN NO. 12**

**Dato' Dr. Mohd Khairuddin bin Aman Razali [ Kuala Nerus ]** minta **MENTERI PENDIDIKAN** menyatakan status terkini projek pembinaan Hospital Pengajar Universiti Sultan Zainal Abidin (UniSZA) yang dimulakan sejak 2016 dan dijangka siap pada 2020 sedangkan setakat Julai tahun lalu dilaporkan ia baru siap 25% sahaja.

**JAWAPAN**

Tuan Yang di-Pertua,

Untuk makluman Ahli Yang Berhormat, projek pembinaan Hospital Pengajar Universiti Sultan Zainal Abidin telah diluluskan di bawah projek baharu *rolling plan 3* Rancangan Malaysia Ke-10. Projek ini meliputi skop pembinaan sebuah hospital pengajar baharu dengan kapasiti 200 katil mengikut piawai dilaksanakan oleh Jabatan Kerja Raya (JKR) dengan kos sebanyak RM345 juta.

Sehingga 21 Mac 2019, status kemajuan kerja-kerja fizikal bagi pembinaan hospital tersebut telah mencapai 40.37 peratus. Projek ini juga berada di hadapan daripada jadual yang telah ditetapkan. Projek ini dijangka siap pada bulan Mei 2020 dan gambar terkini pembangunan projek tersebut akan boleh dilihat oleh Ahli Yang Berhormat dan seluruh rakyat Malaysia di media sosial YB Menteri Pendidikan dan media sosial Kementerian Pendidikan selepas jawapan ini diberikan.

Sekian, terima kasih.

**MESYUARAT PERTAMA, PENGGAL KEDUA  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

**PERTANYAAN** : LISAN  
**DARIPADA** : YB DR. AZMAN ISMAIL  
**KAWASAN** : KUALA KEDAH  
**TARIKH** : 02 APRIL 2019 (SELASA)

**SOALAN :**

**YB DR. AZMAN ISMAIL** minta **MENTERI KERJA RAYA** menyatakan "Standard Operating Procedure" (SOP) yang diikuti oleh pihak pengurusan lebuh raya di dalam menangani kes kemalangan di lebuh raya. Secara purata, berapa lamakah waktu yang diperlukan untuk memastikan aliran trafik kembali normal.

**JAWAPAN :**

Tuan Yang Di-Pertua,

Untuk makluman Ahli Yang Berhormat, Kerajaan amat prihatin terhadap isu kesesakan di lebuhraya khususnya yang disebabkan oleh insiden seperti kemalangan, kerosakan kenderaan, kecemasan dan lain-lain. Pihak Syarikat Konsesi lebuhraya mempunyai SOP di dalam menangani kemalangan yang berlaku di lebuhraya dan ianya adalah berdasarkan *Emergency Respons Plan* (ERP). Selain itu, Syarikat Konsesi Lebuhraya juga mempunyai Garis Panduan dan Petunjuk Prestasi Perkhidmatan Ronda dan Prosidur Tetap Operasi Pengendalian Objek Terjatuh dari Kenderaan di Lebuhraya di dalam menangani perkara berkaitan kemalangan yang berlaku di lebuhraya. Secara amnya tempoh maklum balas (*response time*) bagi pihak peronda untuk sampai ke lokasi atau tempat kejadian setelah menerima maklumat adalah 15 minit. Agensi kecemasan seperti pihak polis, ambulan serta bomba juga akan dihubungi oleh pihak konsesi lebuh raya bergantung kepada tahap kecemasan sesuatu insiden yang terbabit.

Untuk makluman Ahli Yang Berhormat masa yang diambil untuk lebuh raya kembali normal selepas kemalangan adalah bergantung kepada jumlah trafik semasa dan tahap keseriusan kemalangan. Sekiranya hanya melibatkan kecederaan ringan dan tahap kerosakan kenderaan yang minima, masa untuk aliran trafik kembali normal kebiasaannya cepat iaitu kebiasaannya kurang dari 20 minit. Namun demikian, sekiranya melibatkan kecederaan maut atau parah dan kemalangan melibatkan kenderaan berat, masa yang diambil adalah agak lama sehingga lebih dari dua atau tiga jam. Ini juga bergantung kepada kehadiran Pegawai Penyiasat daripada PDRM sekiranya berlaku kemalangan maut.

Selain itu, kesedaran kepada pengguna akan diberikan dari masa ke semasa bagi memaklumkan mengenai kepentingan lorong kecemasan serta supaya kenderaan tidak diletakkan di lorong berkenaan agar bantuan segera dapat diberikan sekiranya terdapat kejadian kemalangan dan sebagainya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : DATO' ROSOL BIN WAHID  
[ HULU TERENGGANU ]**

**TARIKH : 2 APRIL 2019 (SELASA)**

**SOALAN NO. 15**

Minta **MENTERI KESIHATAN** menyatakan :-

- a) cadangan menambahbaik kemudahan prasarana di Hospital Hulu Terengganu khasnya menukar peralatan rawatan yang berusia lebih 25 tahun ; dan
- b) cadangan meningkat bilangan doktor pakar atau MO (*medical officer*) yang bekerja luar waktu bekerja biasa (*on call*) ekoran bilangan pesakit yang semakin bertambah dari hari ke hari .

**JAWAPAN**

**Yang di-Pertua,**

Kementerian Kesihatan Malaysia (KKM) sentiasa mengambil berat tentang keperluan kelengkapan peranti perubatan di semua hospital-hospital KKM.

KKM telah memperuntukan sejumlah RM2,379,613.00 untuk penggantian alat-alat perubatan di Hospital Hulu Terengganu dari tahun 2014 sehingga tahun 2018 bagi mengganti serta menaiktaraf kemudahan peralatan perubatan supaya sentiasa dalam berkeadaan baik dan mengikut peredaran teknologi terkini. Ini termasuklah peralatan *General Radiography*, *Computed Radiography*, ultrasound, mesin hemodialisis, katil pesakit, *patients monitor*, defibrillator dan beberapa alat perubatan lain lagi. Peralatan-peralatan perubatan di fasiliti-fasiliti kesihatan akan sentiasa diganti dan dinaiktaraf dari semasa ke semasa bergantung kepada keperluan dan kemampuan kewangan semasa.

Bagi menampung peningkatan jumlah pesakit yang hadir, KKM telah membenarkan pegawai perubatan menjalankan *lokum* di zon hijau Jabatan Kecemasan bagi hospital yang memenuhi kriteria, serta memperkenalkan perkhidmatan "*extended-hours*" di klinik kesihatan.

KKM prihatin dan sentiasa memantapkan usaha bagi meningkatkan lagi bilangan pakar dan pegawai perubatan (MO) untuk menjamin penyampaian perkhidmatan kesihatan dan perubatan kepada rakyat. Antara usaha yang telah diambil adalah seperti berikut :

- i. Pewujudan jawatan baru bagi Pegawai Perubatan Pakar secara tukar ganti mengambilkira keperluan perkhidmatan dan fasiliti sedia ada serta tidak melibatkan implikasi kewangan tambahan;
- ii. Peningkatan slot tajaan biasiswa Hadiah Latihan Persekutuan untuk program sarjana kepakaran dari 800 slot bagi tahun sebelumnya kepada 1000 slot mulai tahun 2015;

- iii. Menggalakkan pegawai perubatan untuk mendapatkan kepakaran dengan mengikuti program laluan parallel (tajaan sendiri);
- iv. Melantik semula (*renewal*, dengan izin) Pegawai Perubatan Pakar yang telah tamat kontrak untuk berkhidmat dengan KKM mengikut keperluan;
- v. Melantik semula secara kontrak Pegawai Perubatan Pakar warganegara yang telah bersara wajib untuk berkhidmat dengan KKM mengikut keperluan;
- vi. Mendapatkan perkhidmatan kepakaran dari pihak swasta untuk berkhidmat secara *sessional*; dan
- vii. Menggalakkan Pegawai Perubatan Pakar warganegara Malaysia yang berkhidmat di luar Negara untuk pulang ke tanah air.

Sekian, terima kasih.

**PEMBERITAHUAN PERTANYAAN DEWAN RAKYAT**

**PERTANYAAN : JAWAB LISAN**

**DARIPADA : DATO' MOHD. NIZAR BIN HAJI ZAKARIA  
[ PARIT ]**

**TARIKH : 2 APRIL 2019 (SELASA)**

**SOALAN : 16**

**Dato' Mohd. Nizar bin Haji Zakaria [ Parit ] minta MENTERI KOMUNIKASI DAN MULTIMEDIA menyatakan :-**

- (a) setakat hujung tahun 2018, berapakah jumlah mangsa sindiket penipuan atas talian (*online scammer*) di Malaysia; dan
- (b) apakah usaha yang telah dijalankan oleh Kementerian bagi membanteras sindiket penipuan atas talian (*online scammer*).

**JAWAPAN**

Tuan Yang Dipertua,

1. Untuk makluman Ahli Yang Berhormat, Kementerian melalui perkhidmatan Pusat Bantuan Cyber999, Cybersecurity Malaysia (CSM) menerima sebanyak 3,358 aduan yang berkaitan dengan penipuan atas talian sehingga hujung tahun 2018.

1. Kegiatan penipuan amnya tertakluk di bawah Seksyen 420 Kanun Keseksaan di bawah bidang kuasa pihak Polis Diraja Malaysia (PDRM). Manakala, penguatkuasaan undang-undang dan peraturan berkaitan dengan urusan jual beli dalam talian adalah di bawah seliaan Kementerian Perdagangan Dalam Negeri dan Hal Ehwal Pengguna (KPDNHEP). Kementerian melalui Suruhanjaya Komunikasi dan Multimedia (SKMM) dan Cybersecurity Malaysia (CSM) sentiasa

bekerjasama dengan pihak PDRM dan KPDNHEP bagi menangani isu-isu berkaitan dengan penipuan dalam talian.

2. Sekiranya sesuatu kes dirujuk secara bertulis oleh mana-mana agensi penguatkuasaan, tindakan akan diambil oleh SKMM dengan mengekang aktiviti sindiket penipuan ini dengan menyekat talian telefon dan laman sesawang yang berkaitan. SKMM juga membantu siasatan dengan mengenal pasti suspek dengan menggunakan alamat *Internet Protocol*, dengan izin, dan bukti-bukti digital forensik yang ada.
3. Bagi menangani permasalahan penipuan, khususnya berkaitan penipuan panggilan, satu jawatankuasa penguatkuasaan bersepadu yang dinamakan sebagai “Jawatankuasa Jenayah Siber PDRM-MCMC” yang dianggotai oleh Jabatan Siasatan Jenayah Komersial PDRM dan SKMM telah ditubuhkan bagi menerajui gerak kerja dan tindakan dalam usaha memerangi jenayah siber secara lebih strategik dan tersusun.
4. Selain itu, pihak penyedia perkhidmatan komunikasi juga telah diarahkan untuk mengemaskini pangkalan data pelanggan talian telefon prabayar untuk mengelakkan ianya disalahguna oleh pihak yang tidak bertanggungjawab. Sehingga Februari 2019, sebanyak 1,128,385 talian prabayar yang didaftar secara meragukan telah dikesan. Daripada jumlah tersebut, sebanyak 64% talian telah ditamatkan perkhidmatannya dan 33% telah dikemaskini dengan maklumat yang sah. Manakala baki sebanyak 3% talian masih di dalam proses pengesahan maklumat.
5. Selain daripada itu, pihak Kementerian turut memberi keutamaan terhadap usaha meningkatkan kesedaran orang ramai berhubung penipuan dalam talian melalui program-program advokasi pengguna dan kempen-kempen kesedaran di seluruh negara. SKMM telah menjalin kerjasama dengan Persatuan Bank Bank Malaysia (ABM) dan PDRM sejak tahun 2015 dalam kempen Klik Dengan Bijak (KDB) dengan mesej tentang Penipuan (Scam). Mesej advokasi ini dipromosikan melalui iklan akhbar, papan iklan, video dalam talian, iklan digital, serta hantaran media sosial melalui *key opinion leaders* (dengan izin). Mesej advokasi KDB juga dimasukkan dalam modul latihan SKMM untuk melatih

## **SOALAN NO: 16**

Pengurus dan Penolong Pengurus daripada 871 Pusat Internet awam di seluruh negara.

6. Selain itu, CSM pula telah melaksanakan program CyberSAFE (*Cyber Security Awareness for Everyone*) Program-program yang telah dilaksanakan termasuk Ceramah CyberSAFE, CyberSAFE Ambassador, Pertandingan Wacana Keselamatan ICT Kebangsaan dan program *Safer Internet Day* setiap tahun sejak 2010. CSM turut memberi perkhidmatan bagi Pensijilan Malaysia *Trustmark* untuk sektor Swasta (MTPS) dimana perkhidmatan ini menyediakan model pengauditan bagi organisasi yang sah di sisi undang-undang untuk mencapai status sebagai pengamal tingkah laku e-Dagang yang baik, berdasarkan skop yang ditentukan oleh *World Trustmark Alliance* (WTA).

**PEMBERITAHUAN PERTANYAAN LISAN DEWAN RAKYAT**

---

**PERTANYAAN : LISAN**

**DARIPADA : PUAN HAJAH NATRAH BINTI ISMAIL  
[ SEKIJANG ]**

**TARIKH : 2.4.2019 (SELASA)**

**SOALAN NO. 17**

Puan Hajah Natrah binti Ismail [ Sekijang ] minta **MENTERI PENDIDIKAN** menyatakan apakah langkah-langkah yang akan diambil oleh pihak Kementerian dalam membantu penglibatan pelajar-pelajar sekolah dalam program atau pertandingan inovasi di peringkat negeri, kebangsaan dan antarabangsa.

**JAWAPAN**

Tuan Yang di-Pertua,

**Kegiatan Kokurikulum di Sekolah**

Kementerian Pendidikan Malaysia (KPM) telah melaksanakan pelbagai kegiatan kokurikulum melalui pasukan beruniform, kelab dan persatuan serta aktiviti koakademik dalam kalangan murid di seluruh negara bagi menyokong dan melengkapkan pengajaran dan pembelajaran murid di bilik darjah. Sehubungan dengan itu, bagi membantu penyertaan murid dalam program inovasi, KPM sentiasa memberi ruang kepada murid untuk memperkuatkannya kefahaman melalui pembelajaran dalam bilik darjah atau program di luar bilik darjah. Program ini dilaksanakan sama ada secara pendidikan formal dan tidak formal serta berunsurkan inkir, *edutainment* dan juga *fun learning*.

**Program Inovasi di Sekolah**

Peluang untuk murid menerokai pelbagai bidang inovasi ini dilaksanakan di pelbagai peringkat iaitu sekolah, daerah, negeri,

kebangsaan dan juga antarabangsa. Antara aktiviti atau program berbentuk inovasi yang dijalankan oleh KPM di bawah program Sains, Teknologi, Kejuruteraan dan Matematik (STEM) adalah program Robotik, program F1 *In Schools*, Pertandingan Inovasi Sains, Teknologi dan Kejuruteraan, Karnival Sains dan Teknologi serta Pameran-Pameran Inovasi. KPM juga turut menyediakan pembiayaan untuk penyertaan murid ke beberapa pertandingan di peringkat antarabangsa.

### **Kerjasama KPM Dengan Agensi Kerajaan Dan Swasta**

Selain itu, KPM turut bekerjasama dengan agensi kerajaan dan swasta dalam usaha dan menerapkan minat mereka cipta dalam kalangan murid. Antara program yang melibatkan agensi kerajaan dan swasta adalah program Roket Kebangsaan, Program Maxis *Cyber Kids*, Program Toyota *Eco Youth*, Petrosains *Science Show Competition*, *National Science Competition* dan Program *Students On Ice*. Terdapat juga agensi kerajaan dan swasta yang turut membantu dalam membiayai penyertaan murid dalam pertandingan inovasi di peringkat antarabangsa.

KPM sentiasa mengalu-alukan perkongsian maklumat dan kemahiran daripada agensi kerajaan atau swasta dalam membantu meningkatkan keupayaan murid untuk berinovasi dan berkreativiti dan secara langsung meningkatkan kualiti pendidikan. Kerjasama ini terkandung sebagaimana hasrat Anjakan ke-9 Pelan Pembangunan Pendidikan Malaysia 2013 – 2025 iaitu Bekerjasama Dengan Ibu Bapa, Komuniti dan Sektor Swasta secara meluas.

Sekian, terima kasih

RJM 112

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : TUAN LARRY SOON @ LARRY SNG WEI SHIEN [ JULAU ]**

**TARIKH : 2 APRIL 2019 (SELASA)**

**SOALAN NO. 19**

Minta **MENTERI KESIHATAN** menyatakan apakah perancangan Kementerian untuk meningkatkan kadar survival pesakit barah di Malaysia, yang dikatakan mempunyai kadar survival yang terendah di rantau ini, walaupun mempunyai khidmat dan fasiliti kesihatan yang terbaik di dunia.

## **JAWAPAN**

### **Yang di-Pertua,**

Penyakit kanser merupakan salah satu daripada lapan penyebab kematian seluruh dunia dan telah mengatasi penyakit kardiovacular di kebanyakan negara di seluruh dunia. Berdasarkan *International Agency for Research on Cancer (IARC)*, terdapat sebanyak 14.1 juta kes baru kanser dan 8.2 juta kematian disebabkan kanser pada tahun 2012. Beban kanser global ini dijangkakan akan meningkat kepada 21.7 juta dan 13 juta pada tahun 2030, terutama disebabkan faktor demografi. Data *Malaysian National Registry Report 2007-2011*, menunjukkan di Malaysia seramai 103,507 pesakit baru didapati menghidapi penyakit kanser dan seramai 64,275 pesakit didapati mati disebabkan kanser dalam tempoh tersebut.

Antara faktor yang menyebabkan kadar survival yang rendah di Malaysia ialah pesakit lambat mendapatkan pemeriksaan dan rawatan iaitu pesakit datang apabila sudah di tahap yang serius, dan tahap kepatuhan pesakit yang rendah terhadap rawatan (*poor compliance*). Justeru itu, di antara perancangan oleh Kementerian Kesihatan bagi meningkatkan kadar *survival* pesakit barah di Malaysia ialah dengan melaksanakan tiga strategi utama iaitu pencegahan, diagnosa dan rawatan serta penjagaan paliatif seperti berikut:

- i. Aktiviti pencegahan yang meliputi pelbagai promosi, program imunisasi seperti Human Papilloma Virus (HPV) dan hepatitis B dan menggalakkan program saringan awal seperti *pap smear*, Pemeriksaan Sendiri Payudara;
- ii. Meningkatkan kapasiti diagnosa dan rawatan dan menambah pusat rawatan kanser di Malaysia serta meningkatkan bilangan pengambilan sumber manusia; dan
- iii. Mengembangkan perkhidmatan penjagaan paliatif.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**

---

**PERTANYAAN : LISAN**

**DARIPADA : DATUK HALIMAH BINTI MOHAMED  
SADIQUE [KOTA TINGGI - UMNO]**

**TARIKH : 2 APRIL 2019 (SELASA)**

**SOALAN NO. 20**

Minta **MENTERI BELIA DAN SUKAN** menyatakan sasaran peluang pekerjaan yang bakal diisi oleh golongan belia pada tahun 2019 dan sejauh mana kerjasama rentas Kementerian dalam memastikan pengangguran belia akan terus dikurangkan dari semasa ke semasa.

**JAWAPAN**

**Yang di-Pertua,**

1. Di bawah Pelan Strategik Kementerian Belia dan Sukan untuk tahun 2019-2020, Kementerian Belia dan Sukan telah menekankan teras **“Penciptaan Pekerjaan”** sebagai agenda utama oleh KBS terutamanya menyediakan anak muda berkaitan teknologi terkini bagi menghadapi Revolusi Industri 4.0.
2. Ini kerana anak muda perlu bersedia menghadapi **pekerjaan baharu IR4.0** seperti *Data Analyst and Scientists, Big Data Specialist, Artificial Intelligence and Machine Learning Specialist* serta pekerjaan di **industri-industri bernilai tinggi** seperti *Advance Electronics & Electrical Products, Transport Equipments, Machinery Manufacturing, Aerospace* dan lain-lain yang mampu menjana pendapatan dan meningkatkan ekonomi anak muda.

## SOALAN NO. 20

3. Disamping itu, pendekatan IR4.0 ini juga dilihat sangat relevan untuk anak muda memperkasa diri dalam e-Commerce. Berdasarkan rekod Jabatan Perangkaan Malaysia, kadar penggunaan e-commerce pada tahun 2016 adalah sebanyak **6.1%** dan diunjurkan meningkat pada tahun 2020 kepada **11.9%** dengan menjana pendapatan negara sebanyak **RM211 bilion**. Justeru, kementerian melihat inilah kesempatan terbaik untuk kita menggarap segala usaha yang ada bagi meningkatkan penglibatan anak muda dalam kemahiran digital dan e-commerce bagi memacu kemajuan keluarga dan negara.
4. Untuk makluman Ahli Yang Berhormat, berdasarkan laporan **MIDA 2018**, **sebanyak 129,780 pekerjaan baharu** disasarkan melalui pelaburan beberapa sektor utama negara yang memerlukan pekerja berkemahiran tinggi untuk menyokong perkembangan industri masa hadapan. Ia melibatkan industri pembuatan, perkhidmatan dan *primary*.
5. Bagi merancakkan penciptaan peluang pekerjaan baharu, Kementerian Belia dan Sukan sentiasa bekerjasama secara rentas kementerian bagi melaksanakan pelbagai program.
6. Untuk makluman **YB KOTA TINGGI**, Kementerian Belia dan Sukan melalui 22 Institusi Latihan Kemahiran Belia dan Sukan (ILKBS) yang terdiri daripada:
  - a. 13 Institut Kemahiran Belia Negara (IKBN);
  - b. 8 Institut Kemahiran Tinggi Belia Negara (IKTBN); dan
  - c. 1 Akademi Kemahiran Belia Golf (AKBG)

telah menawarkan latihan kemahiran meliputi Tahap 1 hingga Tahap 5 di bawah Sijil Kemahiran Malaysia, Diploma Kemahiran Malaysia dan Diploma Lanjutan Kemahiran Malaysia.

## **SOALAN NO. 20**

7. Selain itu, ILKBS turut menawarkan persijilan profesional yang melibatkan 14 bidang utama antaranya Mekanikal, Elektrik, Elektronik, Teknologi Awam, Hospitaliti, Teknologi Sukan, Fotografi, Personel, Automotif, Tekstil, Teknologi Maklumat, Teknologi Marin, Teknologi Pertanian serta Minyak dan Gas (HSE).
8. Dengan kapasiti sebanyak 10 ribu pelajar bagi program sepenuh masa bagi tahun 2019, KBS bekerjasama dengan dengan pelbagai pihak khususnya **Kementerian Pendidikan Malaysia** bagi memastikan peluang latihan kemahiran disediakan kepada lepasan sekolah.
9. Selain itu, bagi tahun 2019 pihak KBS telah mendapat peruntukan sebanyak RM 2 juta daripada **Kementerian Hal Ehwal Ekonomi** bagi melaksanakan Program Bootcamp TVET yang dilaksanakan secara intensif 4-12 minggu bersama dengan pihak industri. Melalui program ini, sebanyak 500 orang belia disasarkan dengan kerjasama 38 syarikat/majikan.

**Tuan Yang di-Pertua,**

10. Kementerian Belia dan Sukan merupakan rakan strategik utama kepada **Kementerian Pembangunan Usahawan (MED)** dalam melahirkan usahawan belia. Kementerian percaya melalui pelaksanaan program pembangunan usahawan dapat mewujudkan peluang pekerjaan sekaligus mengurangkan kadar pengangguran. Antara program merentasi kementerian yang dilaksanakan adalah Program Youth Career (Y-Career) bersama MED, Program Pembangunan Produk bersama Kementerian Pertanian dan Industri Asas Tani, dan Program Pembungkusan dan Pelabelan Produk melalui kerjasama Industrial Research Institute of Malaysia (SIRIM).

11. Pihak KBS juga mengadakan kerjasama dengan **Kementerian Sumber Manusia** bagi melaksanakan program Pengiktirafan

## **SOALAN NO. 20**

Pencapaian terdahulu (PPT) dan Program Sistem Latihan Dual Nasional (SLDN) yang melibatkan pekerja di industri dengan sasaran bagi tahun 2019 sebanyak 300 orang. Ini secara tidak langsung dapat menawarkan pekerjaan dan mengurangkan kadar pengangguran belia.

12. Selain daripada itu, KBS mengadakan kerjasama dengan Agensi Anti Dadah Kebangsaan dengan menawarkan latihan kemahiran kepada belia berisiko di *Cure and Care Rehabilitation Centre* (CCRC) Karangan, Kedah, CCRC Bachok Kelantan dan *Cure and Care Vocational Centre* (CCVC) Sepang Selangor. Sehingga 2018 seramai 500 orang peserta telah menjalani latihan kemahiran melibatkan bidang kimpalan, automotif, pastri, penyamanan udara dan pendawaian elektrik. Program akan diteruskan bagi tahun 2019.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. TUAN WONG LING BIU**  
**[SARIKEI]**  
**TARIKH : 02 APRIL 2019 (SELASA)**

**SOALAN NO. 21**

**Y.B. TUAN WONG LING BIU [ SARIKEI ]** minta **MENTERI KEWANGAN** menyatakan berapa jumlah peratusan pulangan GST yang telah dikembalikan. Bilakah perkara ini akan selesai.

**JAWAPAN**

Tuan Yang di-Pertua,

Untuk makluman Ahli Yang Berhormat, tunggakan bayaran balik GST setakat 31 Mei 2018 adalah sebanyak RM19.4 bilion yang melibatkan lebih 120,000 regisran. Pada bulan Ogos 2018, Jabatan Kastam Diraja Malaysia (JKDM) telah menetapkan RM19.4 bilion sebagai amaun yang telah melalui pelbagai proses verifikasi, tapisan dan semakan dalaman untuk bayaran balik.

Sehingga 3 Mac 2019, sebanyak RM4.0 bilion telah dibayar balik kepada 54,603 regisran GST oleh JKDM. Semua tunggakan bayaran balik GST akan dibayar balik sepenuhnya seperti mana yang telah diumumkan tertakluk kepada tuntutan yang dibuat oleh syarikat adalah teratur dan mengikut peraturan semasa yang ditetapkan.

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : DATO' SRI ABDUL AZEEZ BIN ABDUL RAHIM [BALING]**

**TARIKH : 2 APRIL 2019 (SELASA)**

**SOALAN NO. 22**

Minta **MENTERI KESIHATAN** menyatakan tindakan yang diambil untuk menangani golongan antivaksin dan apakah langkah pemulihan Kementerian untuk menangani kes penyakit kerintangan vaksin yang semakin meningkat.

## **JAWAPAN**

### **Yang di-Pertua,**

Kementerian Kesihatan Malaysia (KKM) menyedari wujudnya kelompok ibu bapa yang menolak vaksin untuk diberi kepada bayi dan anak-anak mereka dengan alasan-alasan tertentu. Penyebaran pendirian dan dakyah golongan yang menolak vaksin dengan mengaitkan fakta-fakta yang salah berkaitan vaksin dan program imunisasi adalah satu fenomena yang tidak sihat kerana ia menurunkan peratus penerimaan imunisasi seterusnya mendedahkan kepada penularan penyakit cegahan vaksin.

Antara usaha-usaha Kementerian Kesihatan Malaysia bagi meningkatkan kesedaran kebaikan vaksin di kalangan ibu bapa serta menghapuskan stigma negatif terhadap vaksin dengan menggunakan pendekatan pelbagai kaedah, seperti:

- i. Bekerjasama dengan JAKIM dan Pejabat Mufti untuk membetulkan pandangan masyarakat terutama tentang hukum dan fatwa berkaitan imunisasi; dan
- ii. Mengadakan aktiviti-aktiviti publisiti dan pendidikan kesihatan seperti:

Kementerian Kesihatan Malaysia juga melaksanakan pendekatan pendidikan dan advokasi dalam mendidik masyarakat dan golongan anti vaksin tentang kepentingan imunisasi dan bahaya penyakit cegahan vaksin. Terkini, Kementerian Kesihatan bekerjasama dengan Suruhanjaya Multimedia dan Komunikasi dalam memantau laman serta akaun media sosial yang menyebarkan maklumat tidak benar mengenai vaksin dan imunisasi. Semua aduan yang diterima berkaitan pengamal perubatan yang berdaftar yang menyebarkan maklumat yang tidak benar mengenai vaksin dirujuk kepada Majlis Perubatan Malaysia untuk tindakan seterusnya.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT**

**PERTANYAAN : JAWAB LISAN**

**DARIPADA : TUAN HASANUDDIN BIN MOHD YUNUS  
[ HULU LANGAT ]**

**TARIKH : 2 APRIL 2019**

**SOALAN : 23**

**Tuan Hasanuddin bin Mohd Yunus [ Hulu Langat ] minta MENTERI DALAM NEGERI menyatakan status siasatan kematian Allahyarham Adib Mohd Kassim.**

**JAWAPAN**

Tuan Yang di-Pertua,

Kes ini masih dalam proses Inkues di Mahkamah Koroner Shah Alam yang bermula pada 11 hingga 28 Februari 2019 dan pada 1,4,5 Mac 2019 serta akan bersambung pada tarikh-tarikh berikut:-

- i. 19 hingga 29 Mac 2019, dan
- ii. 1 hingga 11 April 2019.

Selain siasatan melibatkan Muhamad Adib, PDRM juga telah membuka 46 kertas siasatan berhubung Insiden yang berlaku di Kuil Sri Maha Mariamman, Jalan USJ 25/1, Subang Jaya, Selangor dengan membuat tangkapan seramai 39 orang. Tujuh (7) individu telah dituduh di Mahkamah.

## **PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : YB DR. NIK MUHAMMAD ZAWAWI  
BIN HAJI SALLEH (PASIR PUTEH)**

**TARIKH : 2 APRIL 2019 (SELASA)**

### **SOALAN NO. 24**

**Minta MENTERI SUMBER MANUSIA menyatakan maklumat terperinci tentang kemahiran spesifik yang boleh yang boleh ditawarkan bagi menyediakan tenaga-tenaga mahir dalam pelbagai bidang teknologi serta apakah perancangan daripada pihak Kementerian dalam mengkaji semula isu dalam skim Latihan Teknikal dan Vokasional (TVET) terutama dari aspek penumpuan bajet dengan cabang-cabang kepakaran.**

### **JAWAPAN**

**Tuan Yang Di-Pertua,**

1. Kementerian Sumber Manusia (KSM) melalui Jabatan Pembangunan Kemahiran (JPK) bekerjasama dengan industri untuk menghasilkan Standard Kemahiran Pekerjaan Kebangsaan (NOSS) yang menggariskan secara terperinci kemahiran spesifik yang diperlukan oleh tenaga mahir dalam pelbagai bidang teknologi. Sehingga Januari 2019, sebanyak 1,845 NOSS telah diwujudkan meliputi 29 sektor industri. NOSS ini boleh diperoleh dari pejabat-pejabat JPK Wilayah yang terletak di Pulau Pinang, Terengganu, Selangor, Johor, Sabah dan Sarawak.

Selain itu, JPK turut menghasilkan Standard Keterampilan Kebangsaan (National Competency Standard – NCS) yang menerapkan kemahiran generik (core abilities) yang perlu ada pada setiap pekerja bagi satu-satu bidang pekerjaan sebagai pelengkap kepada NOSS sedia ada untuk menjadikan pekerja di Malaysia lebih relevan dan berdaya saing.

1. Berkenaan penumpuan kepada bidang-bidang TVET tertentu, KSM sentiasa melaksanakan kajian ‘supply and demand’ dari semasa ke semasa bagi menentukan bidang TVET yang perlu diberikan lebih fokus dan memerlukan peruntukan tambahan sesuai dengan keperluan terkini negara.
2. Kesimpulannya, Kerajaan sentiasa mengkaji semula Standard Kemahiran Pekerjaan Kebangsaan (NOSS) supaya kekal relevan dengan perubahan dalam industri dan memantau bidang TVET yang perlu diberikan fokus berdasarkan keperluan ekonomi negara dan peluang meningkatkan pendapatan rakyat.

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : DATO' SRI DR. SANTHARA [ SEGAMAT ]**

**TARIKH : 2 APRIL 2019**

**SOALAN**

**Dato' Sri Dr. Santhara [ Segamat ]** minta **PERDANA MENTERI** menyatakan adakah Kerajaan Pakatan Harapan bersedia untuk memastikan semua ketua Jabatan Kerajaan membuat perisyntihar harta setiap tahun sebagai salah satu usaha Kerajaan Pakatan Harapan untuk memerangi rasuah dalam kalangan pegawai Kerajaan

**JAWAPAN: YB DATUK WIRA DR. MD FARID BIN MD RAFIK  
TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat, pegawai awam wajib melaksanakan tugas dengan penuh ketelusan dan integriti yang tinggi. Seiring dengan itu, arahan untuk pegawai awam termasuk pegawai kanan mengisyiharkan harta telah diperuntukkan di bawah Peraturan 10, Peraturan-Peraturan Pegawai Awam (Kelakuan dan Tatatertib) 1993. Iaitu semua pegawai dikehendaki mengisyihar secara bertulis kepada Ketua Jabatan masing-masing segala harta yang dimiliki olehnya atau isteri atau suami kepada anaknya atau yang dipegang oleh mana-mana orang bagi pihaknya atau bagi pihak isteri atau suami atau anaknya.

Arahan mengisyiharkan harta turut dijelaskan di dalam Pekeliling Perkhidmatan Bil. 3 Tahun 2012 di mana semua pegawai dikehendaki membuat pengisyntihar harta sekurang-kurangnya sekali dalam tempoh

## **SOALAN NO : 25**

lima (5) tahun. Kegagalan untuk mengisyiharkan harta boleh menyebabkan pegawai diambil tindakan tatatertib di bawah Peraturan-Peraturan Pegawai Awam (Kelakuan dan Tatatertib) 1993.

Selain itu, Jabatan ini melalui Surat Edaran JPA Bil. JPA(S)TT.7076 Klt. 12/(91) bertarikh 16 Januari 2009, telah menambah baik pelaksanaan pengisyiharan harta menerusi aplikasi HRMIS di bawah sub modul Pengisyiharan Harta.

1. Maklumat bagi pegawai polis berpangkat Inspektor dan ke atas, data yang diperolehi menunjukkan sebanyak 99.97% iaitu seramai 13515 daripada 13519 pemilik kompetensi telah mengisyiharkan harta.
2. Manakala status pengisyiharaan anggota tentera berpangkat Mejar / Leftenan Komander ke atas, hanya sebanyak 7.29 % iaitu seramai 772 daripada 10,592 pemilik kompetensi telah mengisyiharkan harta.
3. Penambahbaikan bagi usaha mewajibkan semua penjawat awam untuk mengisyiharkan harta akan diteruskan. Antaranya mencadangkan pembangunan '*alert system*' dalam HRMIS sebagai isyarat kepada Ketua Jabatan tentang kedudukan pengisyiharan harta pegawai:
  - (i) Telah isytihar harta dalam tempoh yang ditetapkan (setiap 5 tahun);
  - (ii) Telah kemaskini pengisyiharan harta setiap kali berlaku pertambahan; dan
  - (iii) Telah isytihar pemilikan harta melebihi pendapatan pegawai

Sekian, terima kasih.

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : Dato' Sri Anifah bin Aman [ Kimanis ]**

**TARIKH : 2 APRIL 2019**

**SOALAN : 26**

**Dato' Sri Anifah bin Aman [ Kimanis ]** minta **PERDANA MENTERI** menyatakan sudah hampir 5 bulan Jawatankuasa Kabinet MA63 ditubuhkan dan dipengerusikan oleh YAB Perdana Menteri dan turut dianggotai oleh beberapa pemimpin Sabah dan Sarawak. Sehubungan itu, apakah perkembangan serta hasil yang telah diperolehi oleh Jawatankuasa ini dan apakah langkah-langkah serta hak-hak yang telah dilaksanakan serta dikembalikan kepada rakyat Sabah dan Sarawak seperti yang termaktub dalam Perjanjian Malaysia 1963 setakat ini.

**JAWAPAN:** **YB TUAN MOHAMED HANIPA BIN MAIDIN**  
**TIMBALAN MENTERI DI JABATAN PERDANA MENTERI**

Tuan Yang di-Pertua,

Untuk makluman Ahli Yang Berhormat, Jawatankuasa Khas Kabinet Untuk Menyemak Pelaksanaan Perjanjian Malaysia 1963 telah ditubuhkan bagi menyemak dan membuat pengesoran kepada Kerajaan berhubung pelaksanaan hak-hak dan autonomi Sabah dan Sarawak selaras dengan peruntukan-peruntukan yang terkandung di dalam Perlembagaan Persekutuan, Perjanjian Malaysia 1963 (***Malaysia Agreement 1963***) dan perkara-perkara yang terkandung di dalam "*Chapter 3, Annexes A and B of the Report of the Inter-Governmental Committee, 1962*".

Mesyuarat pertama Jawatankuasa Pemandu telah dipengerusikan oleh YAB Perdana Menteri, Tun Dr. Mahathir Mohamad pada 17 Disember 2018. Mesyuarat ini telah bersetuju supaya satu laporan interim akan

dibentangkan dalam tempoh **empat (4) bulan** dan satu laporan akhir akan dibentangkan dalam tempoh **enam (6) bulan** daripada tarikh mesyuarat tersebut.

Mesyuarat Jawatankuasa Teknikal yang dipengerusikan secara bersama oleh saya dan Peguam Negara, YBhg. Tuan Tommy Thomas telah diadakan sebanyak dua kali pada 14 Januari 2019 dan 18 Februari 2019. Hasil daripada mesyuarat tersebut, Jawatankuasa-Jawatankuasa Kerja telah ditubuhkan untuk meneliti isu-isu yang berkaitan dengan pelaksanaan Perjanjian Malaysia 1963 berdasarkan terma rujukan dan skop kerja yang telah ditetapkan. Antara Jawatankuasa-Jawatankuasa Kerja tersebut adalah:

- a) Kluster Kewangan - diterajui oleh Kementerian Kewangan;
- b) Kluster Ekonomi - diterajui oleh Kementerian Hal Ehwal Ekonomi;
- c) Kluster Sosial (Kerja Raya) - diterajui oleh Kementerian Kerja Raya;
- d) Kluster Sosial (Perkhidmatan Awam) - diterajui oleh Jabatan Perkhidmatan Awam; dan
- e) Kluster Sosial (Sumber Manusia) – diterajui oleh Kementerian Sumber Manusia.

Kesemua Jawatankuasa-Jawatankuasa ini telah melantik ahli-ahlinya dan memulakan perbincangan masing-masing dalam membincangkan secara lanjut tentang isu-isu kajian yang telah dikenal pasti.

Jawatankuasa Khas Kabinet tersebut akan mengambil masa selama 6 bulan untuk mengemukakan laporan terperinci kepada Kerajaan untuk pelaksanaan seterusnya. Kedudukan Sabah dan Sarawak akan dilihat semula secara teliti berdasarkan peruntukan-peruntukan yang ada di bawah Perlembagaan Persekutuan dan Perjanjian Malaysia 1963.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**  
**MESYUARAT PERTAMA, PENGGAL KEDUA**  
**PARLIMEN KEEMPAT BELAS**

**PERTANYAAN : JAWAB LISAN**  
**DARIPADA : PUAN JUNE LEOW HSIAD HUI**  
**[ HULU SELANGOR ]**  
**TARIKH : 2 APRIL 2019 [ SELASA ]**

**SOALAN NO. 27**

Puan June Leow Hsiad Hui [ Hulu Selangor ] minta **MENTERI PEMBANGUNAN WANITA, KELUARGA DAN MASYARAKAT** menyatakan sama ada Kementerian akan menubuhkan pusat penjagaan kanak-kanak dan warga emas berdasarkan komuniti di kawasan perumahan.

**JAWAPAN**

Tuan Yang di-Pertua,

Kementerian sentiasa menggalakkan penubuhan TASKA berasaskan komuniti bagi membantu golongan berpendapatan rendah. Sebanyak **44** buah TASKA Komuniti telah ditubuhkan di seluruh Malaysia sehingga kini. Geran Operasi sebanyak **RM64,000.00** setahun diperuntukkan kepada sebuah TASKA Komuniti. Buat masa ini kerajaan tidak merancang untuk menambah bilangan TASKA Komuniti. Walau bagaimanapun, Kementerian mengalu-alukan masyarakat untuk mewujudkan pusat penjagaan kanak-kanak yang berasaskan komuniti di kawasan perumahan masing-masing.

Tuan Yang di-Pertua,

Selaras dengan cadangan Kementerian bagi mewujudkan 1 Pusat Aktiviti Warga Emas (PAWE) bagi setiap kawasan Parlimen iaitu 222 buah PAWE keseluruhannya, Kerajaan melalui Rancangan Malaysia Kesebelas (RMK-11) di bawah Strategi B5: Menambah baik Persekutaran Warga Emas di mana usaha bersepadu diambil untuk meningkatkan kualiti hidup warga emas dengan menyediakan infrastruktur mesra warga emas dan menambah baik khidmat penjagaan. Kerajaan telah memperuntukkan sejumlah RM17 juta bagi penambahan 170 buah PAWE baharu sehingga tahun 2023. Penambahan bilangan PAWE di semua kawasan Parlimen merupakan satu usaha Kerajaan bagi menangani isu penuaan di mana Malaysia dijangka menjadi Negara tua pada tahun 2030 dan sehingga kini sebanyak **88** buah PAWE telah diwujudkan.

Pelan transformasi Jabatan Kebajikan Masyarakat (JKM) yang mengambil pendekatan berasaskan kepada komuniti (*community base*) dan antara kriteria yang dititikberatkan dalam penubuhan sesebuah PAWE adalah keperluan PAWE diwujudkan berdasarkan bilangan populasi warga emas di komuniti di samping lokasi premis yang dicadangkan perlu mesra warga emas serta mudah diakses dan pada tahun 2019, sebanyak RM5 juta diperuntukkan bagi penubuhan PAWE baharu.

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : DATO' SERI TIONG KING SING[ BINTULU ]**

**TARIKH : 2 APRIL 2019 [ SELASA ]**

**SOALAN NO. 28**

Minta **MENTERI PERUMAHAN DAN KERAJAAN TEMPATAN** menyatakan :-

- (a) apakah perancangan jangka masa panjang daripada pihak Kementerian untuk mengurangkan risiko banjir kilat perumahan di sepanjang Sungai Kemenan, Sungai Sibiyu; dan
- (b) apakah pihak Kementerian mempunyai perancangan untuk menaik taraf sistem perparitan dan pengaliran di seluruh kawasan bandar Bintulu untuk mengelakkan banjir kilat terutamanya semasa musim tengkujuh.

**JAWAPAN**

Tuan Yang di-Pertua,

**Soalan (a)**

1. Untuk makluman Yang Berhormat, Kementerian Perumahan dan Kerajaan Tempatan (KPKT) telah melaksanakan 7 projek berskala kecil melibatkan skop bina baru atau naik taraf infrastruktur seperti longkang dan parit bagi menambah baik aliran air dan mengurangkan risiko banjir kilat di kawasan perumahan di sepanjang Sungai Kemenan dan Sungai

Sibiyu. Projek-projek ini telah dilaksanakan pada tahun 2016 hingga 2018 dengan kos berjumlah RM933,651.56.

**PERINCIAN PROJEK MENAIK TARAF SISTEM PERPARITAN DAN  
PENGAIARAN DI BINTULU BAGI TAHUN 2016-2018**

| BIL                       | SUB PROJEK  | PERUNTUKAN (RM)   |
|---------------------------|---|-------------------|
| <b>TAHUN 2016</b>         |   |                   |
| 1.                        | Membina Parit Konkrit RPR Kidurong, Fasa 2, Tanjung Kidurong, LK Bintulu, Sarawak   | 122,287.96        |
| 2.                        | Menaiktaraf Parit Kedai (Pejabat Pos Malaysia) Di Pekan Tatau, LK Bintulu, Sarawak  | 189,029.80        |
| <b>JUMLAH</b>             |   | <b>311,317.76</b> |
| <b>TAHUN 2017</b>         |   |                   |
| 3.                        | Membina parit konkrit di penempatan semula Sungai Plan, LK Bintulu, Sarawak         | 367,671.60        |
| 4.                        | Menaiktaraf parit konkrit di Pekan Tatau, Jalan Bintulu -Tatau, LK Bintulu, Sarawak | 195,962.20        |
| <b>JUMLAH</b>             |   | <b>563,633.80</b> |
| <b>TAHUN 2018</b>         |   |                   |
| 5.                        | Membina Baru Pembetung / PC Culvert di Taman Perumahan San-San, LK Bintulu, Sarawak | 19,900.00         |
| 6.                        | Membina Baru Pembetung / PC Culvert di Kampung Jepak, LK Bintulu, Sarawak           | 19,500.00         |
| 7.                        | Membina Baru Pembetung / PC Culvert di Kampung Sungai Plan Lot, LK Bintulu, Sarawak | 19,300.00         |
| <b>JUMLAH</b>             |   | <b>58,700.00</b>  |
| <b>JUMLAH KESELURUHAN</b> |   | <b>933,651.56</b> |

**Soalan (b)**

1. Untuk makluman Yang Berhormat juga, pengurusan kawalan sistem pengairan di Bintulu adalah di bawah bidang kuasa Lembaga Kemajuan Bintulu. Namun begitu, KPKT turut menyediakan peruntukan untuk menaik taraf perparitan di Pihak Berkusa Tempatan (PBT). Sebanyak RM933 ribu telah disediakan bagi melaksanakan 7 projek membina dan menaik taraf sistem longkang dan parit untuk mengurangkan masalah banjir kilat di kawasan Bintulu, Sarawak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**  
**MESYUARAT PERTAMA PENGGAL KEDUA,**  
**PARLIMEN KEEMPAT BELAS**

---

PERTANYAAN : LISAN

DARIPADA : YB PUAN NOORITA BINTI SUAL  
(TENOM)

TARIKH : 02 APRIL 2019 (SELASA)

**SOALAN NO. 29**

Minta **MENTERI SUMBER MANUSIA** menyatakan apakah langkah-langkah yang diambil oleh Kerajaan bagi memastikan silibus/kurikulum yang digunakan dalam bidang TVET relevan dengan perubahan industri 4.0 sekali gus membantu graduan bersaing dalam pasaran pekerjaan kelak.

PN-1412- L03910

**JAWAPAN**

Tuan Yang di-Pertua,

1. Kerajaan menyedari perubahan yang sedang dan akan berlaku di dalam industri berpunca daripada gelombang Revolusi Industri 4.0 (IR 4.0). Disebabkan itu, Kerajaan mengambil langkah-langkah berikut bagi memastikan sibus / kurikulum TVET relevan dengan perubahan Industri 4.0;
  - i) Kementerian Sumber Manusia (KSM) melalui Jabatan Pembangunan Kemahiran (JPK) giat membudayakan pembangunan modal insan yang dipacu industri dengan melantik tiga puluh satu (31) *Industry Lead Body* (ILB) sebagai peneraju dalam sektor industri masing-masing. Sebagai contoh, *Malaysia Digital Economy Corporation (MDEC)* yang dilantik bagi sektor ICT. Antara peranan ILB adalah bekerjasama dengan JPK untuk menghasilkan Standard Kemahiran Pekerjaan Kebangsaan (NOSS) yang menggariskan kemahiran diperlukan bagi setiap pekerjaan dalam industri. Kerjasama strategik ini dapat memastikan kemahiran graduan TVET sentiasa relevan dengan perkembangan industri.

## **SOALAN NO: 29**

- ii) JPK telah mula membangunkan Standard Kemahiran Pekerjaan Kebangsaan (NOSS) dengan mengambil kira keperluan IR 4.0. Sebanyak 30 NOSS telah dibangunkan dengan dimasukkan elemen-elemen teknologi IR 4.0 berdasarkan 9 teras utama revolusi berkenaan, antaranya, *cyber security, augmented reality, Internet of Things (IoT)* dan lain-lain. NOSS ini akan menjadi asas kepada penghasilan kurikulum yang diajar kepada pelatih-pelatih TVET bagi memenuhi keperluan kemahiran IR 4.0.
2. Kesimpulannya, Kerajaan telah mengambil langkah sewajarnya untuk menyediakan graduan TVET dengan pengetahuan dan kemahiran berkaitan IR4.0 supaya dapat bersaing dalam pasaran pekerjaan.

**PEMBERITAHUAN PERTANYAAN LISAN DEWAN RAKYAT**

---

**PERTANYAAN** : JAWAB LISAN

**DARIPADA** : DATUK SERI PANGLIMA MADIUS  
TANGAU [ TUARAN ]

**TARIKH** : 2.4.2019 (SELASA)

**SOALAN** : 30

minta **MENTERI PEMBANGUNAN LUAR BANDAR** menyatakan :-

- (a) berapakah peruntukan Kementerian, dan jenis-jenis bagi Sabah sejak 10 Mei 2018 hingga kini; dan
- (b) apakah Kerajaan bercadang untuk mengkaji pelaksanaan Bekalan Air Luar Bandar serta Bekalan Eletrik Luar Bandar agar lebih terarah serta efisyen.

**JAWAPAN**

Tuan Yang di-Pertua,

Untuk makluman Yang Berhormat, Kerajaan telah memperuntukkan sejumlah RM922.82 juta pada tahun 2018 dan sejumlah RM1.135 bilion pada tahun 2019 kepada negeri Sabah bagi pelaksanaan program/projek seperti pecahan berikut:

| Bil. | Nama Program/<br>Projek                                | Peruntukan Tahun<br>2018<br>(RM juta) | Peruntukan<br>Tahun<br>2019<br>(RM juta) |
|------|--|---------------------------------------|--|
| 1    | Jalan Luar Bandar (JALB)                               | 356.43                                | 316.90                                   |
| 2    | Bekalan Air Luar Bandar<br>(BALB)                      | 116.81                                | 300.56                                   |
| 3    | Bekalan Elektrik Luar Bandar<br>(BELB)                 | 337.07                                | 430.09                                   |
| 4    | Jalan Perhubungan Desa<br>(JPD)                        | 52.95                                 | 20.00                                    |
| 5    | Program Ameniti Sosial<br>(PAMS)                       | 14.30                                 | 10.00                                    |
| 6    | Program Lonjakan Mega Luar<br>Bandar (PLMLB)           | 6.50                                  | 5.90                                     |
| 7    | Program Pemajuan Kawasan<br>(PPK)                      | 1.00                                  | 0.00                                     |
| 8    | Pusat Kegiatan Masyarakat<br>KEMAS                     | 0.25                                  | 0.35                                     |
| 9    | Aktiviti Ekonomi Tambahan<br>(SLDB & LIGS)             | 6.00                                  | 8.49                                     |
| 10   | Infrastruktur Ladang Program<br>Penanaman Semula Sawit | 0.57                                  | 1.00                                     |
| 11   | Latihan & Pembangunan<br>Profesional KEMAS             | 0.50                                  | 0.50                                     |
| 12   | Pembangunan Tanah Geran<br>Komunal                     | 7.15                                  | 5.50                                     |

|                           |  |        |          |
|---------------------------|--|--------|----------|
| 13                        | Pembangunan Tanah Terancang                              | 3.49   | 3.50     |
| 14                        | Tanam Semula Sawit                                       | 16.00  | 18.00    |
| 15                        | Tanaman Getah  | 3.80   | 0.00     |
| 16                        | Pembinaan TABIKA KEMAS                                   | 0.00   | 0.10     |
| 17                        | Institut Kemahiran MARA/ Maktab Rendah/ Kolej Sains MARA | 0.00   | 1.00     |
| 18                        | Institut Perdagangan/KPM MARA (Profesional)              | 0.00   | 5.00     |
| 19                        | Program Giat MARA  | 0.00   | 9.00     |
| <b>JUMLAH KESELURUHAN</b> |  | 922.82 | 1,135.88 |

Untuk makluman Yang Berhormat juga, mekanisme pelaksanaan projek BALB & BELB adalah bergantung kepada senarai keutamaan yang dipohon oleh pihak Unit Perancang Ekonomi Negeri (UPEN) masing-masing. Kementerian sentiasa melibatkan UPEN dalam semua perbincangan, penyelaras dan semak silang sebelum pelaksanaan sesuatu projek dan permohonan belanjawan. Kementerian juga telah mewujudkan Jawatankuasa Bersama diantara Kerajaan Negeri dan Kementerian seperti di Sabah dan Sarawak bagi memastikan pelaksanaan projek lebih efisien.

**PEMBERITAHUAN PERTANYAAN JAWAB LISAN DEWAN RAKYAT**

**PERTANYAAN : JAWAB LISAN**

**DARIPADA : PUAN NOR AZRINA BINTI SURIP [ MERBOK ]**

**TARIKH : 2 APRIL 2019**

**SOALAN : 31**

**Puan Nor Azrina binti Surip [ Merbok ]** minta **MENTERI DALAM NEGERI** menyatakan peruntukan yang diberikan kepada PDRM khususnya kepada Jabatan Logistik. Ini kerana melalui tinjauan saya, kegagalan PDRM bertindak dengan cepat dan pantas adalah kerana kelemahan logistik mereka terutamanya bagi daerah Kuala Muda dalam Parlimen Merbok.

**JAWAPAN**

Tuan Yang di-Pertua,

Peruntukan keseluruhan yang diagihkan kepada Jabatan StaRT, Polis Diraja Malaysia (PDRM) pada tahun 2019 bejumlah RM236,446,450.00 yang mana perlu diagihkan kepada 15 buah Pusat Tanggungjawab (PTJ) dan peruntukan kepada Kontinjen Kedah khususnya adalah sebanyak RM6,732,600.00 bagi agihan fasa pertama yang melibatkan perbelanjaan-perbelanjaan yang diperakukan dan bayaran pukal dari bulan Januari sehingga Jun 2019.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : DATO' SRI HASAN BIN ARIFIN**  
**KAWASAN : ROMPIN**  
**TARIKH : 2 APRIL 2019 (SELASA)**

**SOALAN NO. 32**

Dato' Sri Hasan bin Arifin minta **MENTERI PERDAGANGAN ANTARABANGSA DAN INDUSTRI** menyatakan ekonomi Malaysia dipacu kuat oleh pelaburan dan aktiviti yang dijalankan oleh sektor swasta. Apakah langkah yang dibuat untuk meningkatkan keyakinan pelabur asing untuk datang melabur di Malaysia. Nyatakan jumlah pelaburan yang diterima dalam sektor pembuatan (*manufacturing*) pada tahun 2016, 2017 dan 2018.

**JAWAPAN**

**Yang di-Pertua,**

Antara langkah yang diambil oleh Kementerian untuk meningkatkan keyakinan pelabur asing untuk datang melabur di Malaysia adalah seperti berikut:

1. memperkenalkan pelbagai strategi dan insentif sebagai pemangkin dalam usaha menggalakkan pelaburan bernilai tinggi, termasuk yang berasaskan tren mega industri terkini seperti Industri 4.0 dan ekonomi digital disamping mensasarkan pertumbuhan baharu dalam sektor perkhidmatan yang bernilai tinggi dan berintensifkan pengetahuan yang mampu menyumbang kepada peningkatan jumlah pelaburan dan menjana peluang pekerjaan berpendapatan tinggi. Ini adalah selaras dengan aspirasi negara untuk menjadi negara maju dan inklusif serta memfokuskan kepada pelaburan yang bercirikan teknologi, inovasi dan

## SOALAN NO. 32

nilai ditambah tinggi serta berintensifkan pengetahuan dan modal, pelaburan ini akan dapat menjana lebih banyak peluang pelaburan lain hasil daripada rantai ke hadapan dan ke belakang (*forward and backward linkages*);

2. meneruskan dasar pelaburan yang liberal dan mesra pelabur seperti pemilikan 100% ekuiti asing bagi semua projek dalam sektor perkilangan dan sektor perkhidmatan terpilih serta kebebasan untuk menghantar pulang pelaburan termasuk modal, keuntungan dan dividen;
3. mengkaji semula secara komprehensif dan menambah baik dasar-dasar insentif serta memperkuatkan kemudahan pelaburan agar lebih menarik dan lebih kompetitif serta mampu bersaing khususnya dengan negara-negara lain di rantau ini;
4. menambahbaik pendekatan ekosistem apabila mensasarkan pelaburan ke dalam negara. Melalui pendekatan komprehensif ini, rantai nilai setiap industri diteliti bagi mengenalpasti jurang dalam rantai tersebut dan seterusnya menentukan pelaburan yang dapat melengkapi jurang rantai tersebut;
5. meneruskan usaha penggalakan sedia ada menerusi penganjuran misi-misi pelaburan ke luar negara bagi menggalakkan dan menarik pelaburan baharu. Ini termasuklah penganjuran sesi persidangan pembekal-pembekal industri antaranya melibatkan *business matching*, dengan izin untuk memulakan projek usahasama dengan pelabur tempatan, melaksanakan pengilangan kontrak dan memberi peluang kepada pelabur tempatan untuk membekalkan bahan mentah, komponen atau bahagian kepada pelabur asing yang menuju perniagaan di Malaysia; dan
6. memanfaatkan Komuniti Ekonomi ASEAN atau *ASEAN Economic Community (AEC)* dengan izin, dan Perjanjian Perdagangan Bebas atau *Free Trade Agreements (FTAs)* dengan izin, untuk menjadikan Malaysia sebagai pintu masuk pelaburan dan untuk mendapatkan akses pasaran yang lebih baik. Malaysia telah menandatangi sebanyak enam (6) *Regional FTA* dan tujuh (7) *Bilateral FTA* setakat tahun 2018. Selain itu,

## **SOALAN NO. 32**

Kerajaan juga akan terus memperkuatkan hubungan baik dengan *World Trade Organisation (WTO)* dengan izin, sejak penyertaan Malaysia sebagai ahli WTO untuk memastikan fasilitasi pelaburan langsung asing (FDI) di negara ini terjamin.

Bagi tempoh tiga (3) tahun bermula tahun 2016 hingga 2018, Malaysia mencatatkan jumlah pelaburan asing yang diluluskan sebanyak RM209.6 bilion dengan sebanyak 2,141 projek dalam sektor pembuatan yang telah diluluskan.

| <b>Tahun</b> | <b>Bilangan Projek</b> | <b>Jumlah Pelaburan<br/>(RM billion)</b> |
|--------------|------------------------|--|
| 2016         | 733                    | 58.5                                     |
| 2017         | 687                    | 63.7                                     |
| 2018         | 721                    | 87.4                                     |

**Tuan Yang di-Pertua,**

Kerajaan sentiasa berusaha menambahbaik dasar dan strategi untuk menarik pelaburan yang berkualiti ke dalam negara. Usaha ini adalah penting bagi memastikan dasar Kerajaan adalah selaras dengan keperluan negara sekaligus dapat mengukuhkan kedudukan negara sebagai destinasi pilihan pelabur.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : DATO' ABDULLAH SANI  
BIN ABDUL HAMID [ KAPAR ]**

**TARIKH : 2 APRIL 2019 [ SELASA ]**

**SOALAN NO. 33**

Minta **MENTERI PERUMAHAN DAN KERAJAAN TEMPATAN** menyatakan tindakan yang akan diambil atau sedang dirancang berkenaan rumah pangsa yang uzur, kerosakan lif dan memerlukan cat baru bagi kawasan Kapar.

**JAWAPAN**

Tuan Yang di-Pertua,

1. Untuk makluman Yang Berhormat, Tabung Penyelenggaraan Perumahan Malaysia (TPPM) merupakan inisiatif Kerajaan bagi membantu penghuni-penghuni perumahan berstrata kos rendah dan sederhana rendah swasta untuk membaik pulih dan menyenggara bangunan dan harta bersama. Skop pemberian termasuklah membaik pulih rumah pangsa yang uzur, lif yang rosak serta cat baharu.
2. Untuk makluman Yang Berhormat, bermula tahun 2014 sehingga 2017, Kementerian Perumahan dan Kerajaan Tempatan (KPKT) telah menerima sebanyak 690 permohonan (476 projek rumah kos rendah dan

214 projek rumah kos sederhana rendah) daripada *Joint Management Body / Management Corporation* (JMB / MC) dan Pihak Berkuasa Tempatan (PBT) di seluruh negara.

3. Daripada jumlah tersebut, sebanyak 454 permohonan (merangkumi 324 projek rumah kos rendah dan 130 projek rumah kos sederhana rendah) berjumlah RM326.8 juta telah diluluskan oleh KPKT.

4. Berdasarkan jumlah kelulusan yang telah dinyatakan tadi, sebanyak 150,000 unit rumah (105,000 projek rumah kos rendah dan 45,000 projek rumah kos sederhana rendah) melibatkan sebanyak 600,000 penghuni (420,000 projek rumah kos rendah dan 180,000 projek rumah kos sederhana rendah) telah menerima manfaat daripada Program TPPM yang dilaksanakan oleh Kerajaan.

5. Bagi kawasan Kapar, KPKT telah meluluskan peruntukan sebanyak RM1.8 juta untuk membaik pulih Pangsapuri Seri Perantau yang melibatkan pembaikan tangki air, paip sanitari dan bumbung. Projek ini telah diluluskan pada tahun 2017 dan telah disiapkan pada tahun 2018.

6. Untuk makluman Yang Berhormat, KPKT akan mempertimbangkan permohonan-permohonan yang dikemukakan oleh semua PBT pada tahun ini untuk dilaksanakan pada tahun 2020. Walau bagaimanapun, kelulusan adalah tertakluk kepada peruntukan yang diterima oleh KPKT pada tahun 2020. Keutamaan akan diberikan kepada pembaikan kritikal yang melibatkan isu keselamatan seperti lif, tangki air, bumbung dan susur tangga.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEDUA  
PARLIMEN KEEMPAT BELAS**

---

**PERTANYAAN : LISAN**

**DARIPADA : TAN SRI NOH BIN HAJI OMAR  
[ TANJONG KARANG ]**

**TARIKH : 2 APRIL 2019 [ SELASA ]**

**SOALAN NO. 34**

Minta **MENTERI PERUMAHAN DAN KERAJAAN TEMPATAN** menyatakan perbezaan di antara Rumah Transit dan PPR.

**JAWAPAN**

Tuan Yang di-Pertua,

1. Untuk makluman Yang Berhormat, Program Rumah Transit adalah satu program yang disediakan oleh Kerajaan untuk memberi kemudahan penyewaan perumahan secara sementara kepada pasangan muda yang baru berkahwin bagi mengurangkan beban pasangan muda yang berpendapatan rendah dan sederhana di kawasan bandar.
2. Syarat permohonan bagi Program Rumah Transit adalah:
  - (a) Pemohon dan pasangan warganegara Malaysia;

- (b) Berumur 18 hingga 30 tahun;
- (c) Pemohon bekerja di kawasan/negeri rumah transit yang dimohon;
- (d) Tidak memiliki rumah di kawasan/negeri yang dimohon;
- (e) Pendapatan isi rumah tidak melebihi RM5,000 sebulan; dan
- (f) Tiada rekod jenayah.

3. Sehingga kini, Kementerian Perumahan dan Kerajaan Tempatan (KPKT) telah menyediakan 2 program Rumah Transit seperti berikut:

| BIL. | PROGRAM   | UNIT | PIHAK PENGURUSAN |
|------|---|------|------------------|
| 1.   | Rumah Transit Bukit Jalil,<br>Kuala Lumpur      | 632  | JPN              |
| 2.   | Rumah Transit Sg. Melana,<br>Johor Bahru, Johor | 390  | SUK Johor        |

4. Melalui Program Rumah Transit, pemohon yang layak akan ditawarkan satu unit rumah untuk disewa bagi tempoh permulaan selama 3 tahun dengan opsyen lanjutan maksimum selama 2 tahun (1 + 1) dengan kadar sewaan RM250.00 sebulan termasuk yuran penyelenggaraan.

5. Untuk makluman Yang Berhormat, selain daripada Program Rumah Transit, KPKT juga telah melancarkan Program Rumah Transit Belia khusus untuk membantu golongan muda di kawasan bandar mendapat kemudahan kediaman di mana dijangkakan sebanyak 3,648 unit Rumah Transit Belia akan dibina di 3 kawasan iaitu di Mukim

Kepong, Mukim Batu dan Pekan Kuang, Daerah Gombak. Program ini mempunyai 2 jenis spesifikasi rumah iaitu pangsapuri jenis studio (400kps) dan pangsapuri jenis 2 bilik (550kps).

6. Antara kelebihan program ini adalah Kerajaan memperkenalkan kaedah '*Force Saving*' yang memberi pulangan wang simpanan kepada penyewa setelah tamat tempoh sewaan bagi membantu penyewa menyediakan deposit untuk membeli rumah. Selain itu juga, kadar sewaan unit rumah di bawah program ini adalah 30% lebih rendah berbanding harga pasaran.

7. Program Perumahan Rakyat (PPR) pula adalah satu program KPKT yang dilaksanakan bagi memenuhi keperluan perumahan kepada golongan berpendapatan rendah dan penempatan semula setinggan. Terdapat 2 kategori PPR iaitu PPR Disewa dan PPR Dimiliki di mana bagi PPR Disewa, kadar sewaan yang dikenakan adalah RM124.00 sebulan, manakala bagi PPR Dimiliki harga jualan ialah RM35,000 seunit di Semenanjung Malaysia dan RM42,000 seunit di Sabah dan Sarawak.

8. Syarat permohonan bagi Program Perumahan Rakyat (PPR) adalah seperti berikut:

- (a) Pemohon warganegara Malaysia;
- (b) Berumur 18 dan ke atas;
- (c) Pemohon dan pasangan tidak memiliki rumah;
- (d) Pendapatan isi rumah di bawah RM3,000 sebulan; dan
- (e) Mengikut syarat - syarat tambahan yang ditetapkan oleh Kerajaan Negeri.

**PEMBERITAHUAN PERTANYAAN JAWAB LISAN DEWAN RAKYAT**

**PERTANYAAN : JAWAB LISAN**

**DARIPADA : TUAN SU KEONG SIONG [ KAMPAR ]**

**TARIKH : 2 APRIL 2019**

**SOALAN : 35**

**Tuan Su Keong Siong [ Kampar ]** minta **MENTERI DALAM NEGERI** menyatakan secara terperinci jumlah Pemastautin Tetap warga emas Malaysia yang telah diberikan kewarganegaraan sejak 9 Mei 2018 sehingga 31 Januari 2019. Nyatakan status perlaksanaan pemberian kewarganegaraan kepada anak-anak yang dilahirkan di Malaysia kepada sekurang-kurangnya seorang ibu atau bapa yang merupakan warganegara Malaysia.

**JAWAPAN**

Tuan Yang di-Pertua,

Berdasarkan rekod Jabatan Pendaftaran Negara (JPN) pada 9 Mei 2018 hingga 31 Januari 2019, seramai 692 orang pemohon dari kalangan individu pemegang kad pengenalan Pemastautin Tetap (MyPR) berumur 60 tahun dan ke atas serta telah memenuhi syarat-syarat yang telah ditetapkan di dalam Bahagian III Perlembagaan Persekutuan telah dianugerahkan kewarganegaraan Malaysia.

Untuk makluman Ahli Yang Berhormat, kelahiran di Malaysia tidak menyebabkan seseorang individu memperoleh kewarganegaraan Malaysia secara automatik. Status kewarganegaraan seseorang individu adalah bergantung kepada taraf kewarganegaraan dan pendaftaran perkahwinan ibu bapa yang sah mengikut undang-undang negara yang berkuatkuasa. Sehubungan dengan itu, bagi kelahiran yang berlaku sebelum pendaftaran perkahwinan ibu bapa, taraf kewarganegaraan

kanak-kanak tersebut adalah mengikut taraf kewarganegaraan ibunya selaras dengan peruntukan undang-undang di bawah Seksyen 17, Bahagian III, Jadual Kedua, Perlembagaan Persekutuan. Oleh yang demikian, urusan pendaftaran perkahwinan ibu bapa adalah sangat penting kerana ia bakal menentukan taraf kewarganegaraan anak yang dilahirkan.

Bagi kanak-kanak berumur kurang dari 21 tahun yang bertaraf bukan warganegara, ibu bapa atau penjaga yang sah boleh mengemukakan permohonan untuk kanak-kanak itu memperoleh kewarganegaraan Malaysia melalui pendaftaran di bawah Perkara 15A, jika telah memenuhi syarat-syarat yang ditetapkan oleh Perlembagaan Persekutuan dan perundangan yang berkaitan dengan pendaftaran perkahwinan, pendaftaran kelahiran, pengangkatan yang sah serta lain-lain perundangan berkuat kuasa.

**PEMBERITAHUAN PERTANYAAN JAWAB LISAN DEWAN RAKYAT**

**PERTANYAAN : JAWAB LISAN**

**DARIPADA : DATO' SERI HAJI ABDUL HADI BIN AWANG  
[ MARANG ]**

**TARIKH : 2 APRIL 2019**

**SOALAN : 36**

**Dato' Seri Haji Abdul Hadi bin Awang [ Marang ]** minta **MENTERI DALAM NEGERI** menyatakan sejauh manakah hasrat Kerajaan untuk memansuhkan Akta Kesalahan Keselamatan (Langkah-Langkah Khas) 2012 (SOSMA), Akta Perhimpunan Aman 2012, Akta Pencegahan Keganasan 2015 (POTA) dan Akta Hasutan 1948.

**JAWAPAN**

Tuan Yang di-Pertua,

Kementerian Dalam Negeri (KDN) telah menubuhkan Jawatankuasa Khas Kajian Undang-Undang dan Jawatankuasa Teknikal bagi mengkaji kesemua enam (6) akta yang berada di bawah kuasa KDN iaitu;

1. Akta Kesalahan Keselamatan (Langkah - langkah Khas) 2012 (SOSMA);
2. Akta Pencegahan Jenayah 1959 (POCA);
3. Akta Pencegahan Keganasan 2015 (POTA);
4. Akta Hasutan 1984;
5. Akta Perhimpunan Aman 2012 (APA); dan
6. Akta Mesin Cetak dan Penerbitan 1984 (AMCP).

Selain jabatan kerajaan seperti Jabatan Peguam Negara dan Polis Diraja Malaysia (PDRM), kedua-dua jawatankuasa ini turut dianggotai oleh wakil Badan Peguam Malaysia, Suruhanjaya Hak Asasi Manusia (SUHAKAM), pengamal undang-undang dan ahli akademik.

Melalui beberapa siri mesyuarat dan bengkel yang telah diadakan, ahli kedua-dua jawatankuasa berkenaan telah membangkitkan pelbagai isu dan pandangan berkenaan akta-akta tersebut seperti tempoh tahanan, kuasa polis dan ruang untuk semakan kehakiman (*judicial review*).

Buat masa ini KDN sedang meneliti kesemua isu dan pandangan yang dikemukakan oleh kedua-dua jawatankuasa tersebut. Seterusnya KDN akan mengemukakan syor berkenaan undang-undang berkenaan kepada Jemaah Menteri untuk diputuskan.

**PEMBERITAHUAN PERTANYAAN LISAN DEWAN RAKYAT**

---

**PERTANYAAN : LISAN**

**DARIPADA : DATO' MANSOR OTHMAN [ NIBONG TEBAL ]**

**TARIKH : 2 APRIL 2019 (SELASA)**

**SOALAN NO. 37**

**Dato' Mansor Othman [ Nibong Tebal ]** minta **MENTERI PENDIDIKAN** menyatakan menjelaskan mekanisme pemantauan pengoperasian kolej-kolej IPTS di seluruh negara, khususnya, Kolej IPTS *Netherlands Maritime Institut of Technology* di Johor Bahru yang diberitakan menggunakan nama MARA sebagai penaja pengajian bagi sesi ambilan pelajar-pelajar tahun pengajian 2014/15, tetapi sebenarnya MARA menafikan bertanggungjawab sebagai penaja.

**JAWAPAN**

Tuan Yang Di-Pertua,

Untuk makluman Ahli Yang Berhormat, Kementerian Pendidikan Malaysia (KPM) melalui Jabatan Pendidikan Tinggi (JPT) bertanggungjawab untuk memantau perkhidmatan institusi pendidikan tinggi swasta (IPTS) bagi memastikan pengoperasiannya selaras dengan dasar Kementerian serta mematuhi segala peruntukan perundangan yang termaktub di dalam Akta Pendidikan Tinggi Swasta (Akta 555) dan peraturan-peraturan di bawahnya. Pihak KPM turut bekerjasama dengan Kementerian dan agensi penguat kuasa lain dalam memastikan kualiti perkhidmatan IPTS dan standard pendidikan tinggi negara terjaga.

Berhubung dengan IPTS yang dimaksudkan iaitu berkaitan penggunaan nama “MARA”, pihak Kementerian ada menerima aduan berkaitan dan isu tersebut telah diselesaikan oleh pihak IPTS melalui pertemuan dengan pelajar dan ibu bapa pelajar pada tahun 2017. Bagi sebarang bentuk aduan dan laporan ketidakakururan oleh IPTS yang membuat pernyataan mengelirukan kepada orang awam, Kementerian akan menjalankan siasatan dan pemeriksaan dan mengambil tindakan perundangan yang wajar iaitu jika sabit kesalahan, IPTS boleh didenda RM50,000.00 atau penjara tidak melebihi enam bulan atau kedua-duanya.

Sekian, terima kasih.

RJM 107

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SERI AZALINA OTHMAN SAID  
[PENGERANG]**

**TARIKH : 2 APRIL 2019 (Selasa)**

**SOALAN NO. 38**

Minta **MENTERI HAL EHWAL EKONOMI** menyatakan berapakah hasil yang telah disumbangkan oleh RAPID Pengerang sejak ianya mula beroperasi serta langkah-langkah Kerajaan dalam menggiatkan usaha untuk memastikan komuniti dan penduduk setempat juga mendapat faedah dari projek ini memandangkan penduduk setempat terpaksa menyesuaikan diri dengan perubahan modenisasi sekeliling yang begitu cepat yang juga melibatkan peningkatan kos sara hidup yang mendadak.

**JAWAPAN**

Tuan Yang di-Pertua,

1. Untuk makluman Ahli Yang Berhormat, pembangunan Fasa 1 Kompleks Petroleum Bersepadu Pengerang (*Pengerang Integrated Petroleum Complex, PIPC*) yang merangkumi ***Pengerang Deepwater Terminals (PDT)*** dan ***Pengerang Integrated Complex (PIC)*** telah memberi sumbangan sosio-ekonomi kepada negeri dan rakyat Johor khususnya komuniti dan penduduk setempat seperti berikut:
  - (a) Penglibatan syarikat berkaitan Kerajaan Negeri Johor dalam pembangunan industri hiliran minyak dan gas di Pengerang termasuk:
    - (i) **Johor Corporation (JCorp)** yang sedang membangunkan ***Pengerang Industrial Park (PIP)*** seluas 786 ekar bersebelahan dengan PIC yang akan menyediakan tempat kepada syarikat-syarikat petrokimia dan loji pembuatan produk hiliran berdasarkan petrokimia; dan
    - (ii) Perbadanan Islam Johor melalui anak syarikatnya, Presind Samudra Sdn. Bhd. terlibat dalam projek ***Pengerang Eco-Industrial Park (PeIP)*** yang dimajukan oleh Serba Dinamik Holdings Berhad iaitu sebuah syarikat perkhidmatan kejuruteraan minyak dan gas. Projek di atas tapak seluas 68 ekar milik Presind Samudra ini akan menjadi pusat perkhidmatan “*maintenance, repair and overhaul (MRO)*” dan “*inspection, repair and maintenance (IRM)*” untuk industri hiliran minyak dan gas di PIPC selain turut menyediakan khidmat latihan teknikal untuk pekerja-pekerja industri.

- (b) Pada fasa pembinaan PIC oleh PETRONAS, sebanyak 236 syarikat bumiputera Johor telah dilantik untuk menjalankan kerja-kerja berkaitan pembinaan dengan nilai kontrak berjumlah USD645.60 juta. Ini melibatkan kerja-kerja pembinaan, penyenggaraan, pemasangan paip, kejuruteraan elektrik, serta pembekalan pekerja, khidmat pengangkutan dan “marine hardware”;
- (c) Sepanjang tempoh 2013 hingga 2018, **Johor Petroleum Development Corporation Berhad (JPDC)**, iaitu agensi di bawah Kementerian Hal Ehwal Ekonomi (MEA) telah menjalankan program latihan kemahiran teknikal dalam bidang berkaitan industri hiliran minyak dan gas melibatkan **3,678 pelatih dan tenaga kerja**. Daripada jumlah tersebut, **80 peratus** adalah anak Johor khususnya penduduk setempat di Kota Tinggi dan Pengerang yang mana **95 peratus** daripada mereka telah diambil bekerja sebaik sahaja menamatkan program-program latihan. Selain mendapat pembiayaan latihan daripada agensi-agensi Kerajaan Persekutuan, JPDC juga melaksanakan program-program latihan tersebut dengan kerjasama pusat-pusat latihan teknikal dan vokasional serta syarikat-syarikat dalam industri hiliran minyak dan gas.
- (d) JPDC kini sedang mengatur program pembangunan tenaga kerja mahir serta memudahkan cara pembentukan komuniti usahawan dan syarikat tempatan, terutamanya dari Johor dan Pengerang, yang berkelayakan dan berkeupayaan untuk menyokong keperluan fasa operasi PIPC.
2. Disamping itu, Petroliam Nasional Berhad (PETRONAS), selaku pemilik Projek Pembangunan Bersepadu Penapisan Minyak dan Petrokimia (RAPID) sentiasa melaksanakan program yang melibatkan komuniti dan penduduk setempat secara berterusan bagi memastikan faedah secara langsung dan tidak langsung dari pembangunan PIC dapat dinikmati. Program-program tersebut merangkumi dua teras utama iaitu:

**NO SOALAN: 38**

- (a) pembangunan ekonomi (*economic wellbeing*) seperti penawaran peluang pekerjaan dan perniagaan; dan
- (b) pembangunan kesejahteraan sosial (*social wellbeing*) seperti program kesihatan dan program pembangunan komuniti setempat.

Sekian, terima kasih.

Kementerian Hal Ehwal Ekonomi

2 April 2019

## **PEMBERITAHUAN PERTANYAAN LISAN DEWAN RAKYAT**

**PERTANYAAN :** LISAN

**DARIPADA :** PUAN RUSNAH BINTI ALUAI [ TANGGA BATU ]

**TARIKH :** 2 APRIL 2019 | SELASA

**SOALAN :**

Puan Rusnah binti Aluai [ Tangga Batu ] minta **PERDANA MENTERI** menyatakan isu mengenai caj penuh kepada mereka yang berjaya dalam rayuan pertama menunaikan haji dan jemaah pengiring mahram haji yang mendatangkan ketidakpuasan hati orang ramai.

**JAWAPAN :** (**MENTERI DI JABATAN PERDANA MENTERI**)

Tuan Yang Dipertua,

Untuk makluman, semua jemaah haji muassasah yang menunaikan haji kali pertama layak untuk menerima bantuan subsidi daripada Tabung Haji, termasuk pengiring dan mereka yang merayu bagi tahun ini.

Keputusan ini telah dimuktamadkan dan diumumkan pada 28 Februari 2019 selepas mengambilkira pelbagai aspek termasuk keupayaan dan kedudukan unjuran kewangan Tabung Haji bagi tahun 2019.

Sehubungan itu, Bayaran Haji bagi jemaah haji Muassasah yang layak menerima subsidi seperti di atas untuk Musim Haji 1440 Hijrah adalah RM9,980.

Sekian. Terima kasih.

**PEMBERITAHUAN PERTANYAAN LISAN DEWAN RAKYAT**

---

**PERTANYAAN : LISAN**

**DARIPADA : DATO' HASBULLAH BIN OSMAN [ GERIK ]**

**TARIKH : 2.4.2019 (SELASA)**

**SOALAN NO. 40**

**Dato' Hasbullah bin Osman [ Gerik ]** minta **MENTERI PENDIDIKAN** menyatakan :-

- a) berapakah jumlah murid di sekolah rendah dan menengah aliran kebangsaan pada Januari 2019 dan pecahan mengikut kaum; dan
- b) apakah "trend" kemasukan murid-murid dari kalangan bukan Bumiputera ke sekolah-sekolah aliran kebangsaan bertambah atau menyusut dan setakat manakah kejayaan kementerian mengurangkan masalah guru duka lara yang bertugas berjauhan daripada pasangan masing-masing.

**JAWAPAN**

Tuan Yang di-Pertua,

(a) Berdasarkan data Aplikasi Data Murid (APDM) Kementerian Pendidikan Malaysia (KPM), jumlah keseluruhan murid di sekolah rendah dan menengah aliran kebangsaan sehingga 31 Januari 2019 adalah seramai 4,734,606. Daripada jumlah tersebut, seramai 454,278 (Bumiputera Sabah), 2,858,212 (Melayu), 769,417 (Cina), 294,751 (India), 37,990 (Orang Asli), 262,942 (Bumiputera Sarawak), dan 57,016 (lain-lain).

(b) Untuk makluman Ahli Yang Berhormat, murid bukan Melayu lebih cenderung memilih sekolah vernakular kerana ibu bapa cenderung untuk anak-anak mereka menguasai bahasa ibunda mereka sejak awal persekolahan. Peratusan murid bukan Melayu di Sekolah Kebangsaan bagi tahun 2016, 2017 dan 2018 masing-masing adalah sebanyak 6.12%,

5.57%, dan 5.24%. Manakala, peratusan murid bukan Melayu di Sekolah Menengah Kebangsaan bagi tahun 2016, 2017 dan 2018 masing-masing adalah sebanyak 25.06%, 24.61%, dan 24.09%.

Berhubung dengan isu guru yang tinggal terpisah daripada pasangan, KPM sentiasa berusaha bagi memastikan isu ini dapat diselesaikan. Walau bagaimanapun isu guru duka lara akan terus wujud kerana urusan perpindahan tempat kerja oleh pasangan guru atau guru-guru baharu yang mendirikan rumah tangga sentiasa berlaku sepanjang tahun. KPM akan memberi keutamaan kepada permohonan bagi alasan untuk mengikut pasangan, selain turut mempertimbangkan juga kelulusan bagi kes-kes lain seperti kes sakit kronik dan kes ancaman keselamatan. Kelulusan pertukaran guru juga bergantung kepada tiga perkara utama, iaitu Keperluan Perkhidmatan, Kekosongan Jawatan dan Keperluan Opsyen di negeri yang dimohon.

Kementerian Pendidikan Malaysia (KPM) ingin memaklumkan bahawa dalam tempoh 1 Januari 2016 hingga 1 Januari 2019 seramai 14,511 orang guru telah diluluskan pertukaran mengikut pasangan. Baki permohonan pertukaran guru bagi kes duka lara yang belum diluluskan sehingga kini adalah sebanyak 4,186 permohonan.

Sekian, terima kasih

RJM 108

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. PUAN MARIA CHIN BIN ABDULLAH**  
**[PETALING JAYA]**  
**TARIKH : 2 APRIL 2019 (SELASA)**

**SOALAN NO. 41**

**Y.B. PUAN MARIA CHIN BIN ABDULLAH [PETALING JAYA]** minta **MENTERI KEWANGAN** menyatakan mengapakah laktosa, sejenis gula semula jadi dalam produk tenusu, diambil kira di bawah “jumlah gula” yang digunakan untuk mengenakan cukai SSB.

**JAWAPAN**

Tuan Yang di-Pertua,

Untuk makluman Ahli Yang Berhormat, laktosa merupakan gula semula jadi yang wujud dalam produk tenusu. Kandungan laktosa sedia ada dalam produk tenusu yang belum melalui sebarang proses adalah berada pada julat 4.5g/100ml sehingga 5.5g/100ml.

Sehubungan itu, Kerajaan telah bersetuju untuk menaikkan nilai ambang kandungan gula daripada 5 gram per 100 mililiter kepada 7 gram per 100 mililiter bagi produk minuman berasaskan susu yang mengandungi laktosa (*flavoured milk*) di bawah kepala kod tarif 22.02, tidak termasuk produk minuman susu soya. Ini adalah kerana pihak industri berkemungkinan akan mengurangkan kandungan laktosa di dalam produk tenusu mereka untuk mencapai kadar *threshold* dan secara tidak langsung kebaikan nutrien daripada laktosa tidak dapat diperolehi oleh pengguna. Dengan kenaikan *threshold* gula daripada 5g/100ml kepada 7g/100ml, pengeluar mempunyai ruang menambah gula tambahan dalam julat 1.5g/100ml sehingga 2.5g/100ml.

Kenaikan nilai ambang bagi produk ini menunjukkan keprihatinan Kerajaan terhadap usaha untuk terus menggalakkan pengambilan produk berasaskan susu yang mengandungi paras kandungan gula yang lebih sihat di kalangan pengguna.

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : TUAN SHAHARIZUKIRNAIN BIN ABD. KADIR  
[SETIU]**

**TARIKH : 2 APRIL 2019 (SELASA)**

**SOALAN NO: 42**

Minta **MENTERI TENAGA, SAINS, TEKNOLOGI, ALAM SEKITAR DAN PERUBAHAN IKLIM** menyatakan status terkini projek solar My Suria dan adakah Kementerian bercadang untuk mempelbagaikan penggunaan ladang solar kepada aktiviti lain seperti pertanian dan penternakan selain daripada untuk mendapatkan tenaga elektrik sebagaimana amalan di negara-negara lain.

**JAWAPAN**

Tuan Yang di-Pertua,

Untuk makluman Ahli Yang Berhormat,

1. Pelaksanaan Projek MySuria telah tamat pada 31 Disember 2018. Seramai 332 orang peserta program ini yang terdiri daripada golongan B40 telah dan akan menerima bayaran bulanan hasil penjanaan tenaga boleh baharu yang dijual kepada syarikat utiliti untuk tempoh selama 10 tahun.
2. Untuk mengoptimumkan produktiviti ladang solar melalui aktiviti-aktiviti lain seperti pertanian dan penternakan, Kerajaan menggalakkan pembangunan projek solar dengan elemen dwifungsi (*dual functions*) dan dimasukkan sebagai salah satu kriteria dalam mempertimbangkan projek tenaga boleh baharu (TBB) berdasarkan sumber solar. Antaranya ialah:

**NO. SOALAN : 42**

- (a) pemberian bonus khas kepada penerima *Feed-in Tariff* (FiT) yang menjalankan aktiviti ekonomi lain di bawah struktur sistem *photovoltaic* (PV) yang dipasang; dan
- (b) pemberian markah merit dalam penilaian pembidaan projek *Large Scale Solar* (LSS) kepada pengusaha yang membangunkan projek LSS di atas tapak tanah yang akan digunakan bersekali dengan aktiviti ekonomi yang lain.
3. Sehingga kini, sebanyak 36 projek di bawah Program FiT telah menerapkan elemen pertanian dan penternakan dalam melaksanakan projek mereka.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**  
**MESYUARAT PERTAMA, PENGGAL KEDUA**  
**PARLIMEN KEEMPAT BELAS**

**PERTANYAAN : JAWAB LISAN**  
**DARIPADA : TUAN MUSLIMIN BIN YAHAYA**  
                  **[ SUNGAI BESAR ]**  
**TARIKH : 2 APRIL 2019 (SELASA)**

**SOALAN NO. 43**

Tuan Muslimin Bin Yahaya [ Sungai Besar ] minta **MENTERI PEMBANGUNAN WANITA, KELUARGA DAN MASYARAKAT** menyatakan apakah perancangan KPWKM melalui JKM memastikan pusat jagaan warga emas mendapat menarik perhatian orang awam dan warga emas itu sendiri untuk menjadikan pusat jagaan itu sebagai pusat sehenti harian.

**JAWAPAN**

Tuan Yang di-Pertua,

Kementerian melalui Rancangan Malaysia Ke Sebelas (RMK-11); Strategi B5: Menambah baik Persekutaran Warga Emas, akan meneruskan usaha bagi menambah bilangan Pusat Aktiviti Warga Emas (PAWE) dengan sasaran menuju satu PAWE di setiap kawasan Parlimen (222 Parlimen).

Sehingga Februari 2019, 88 buah PAWE telah ditubuhkan dengan 38,627 warga emas sedang mendapat manfaat dari program berkenaan. Bagi tahun 2019, Kementerian telah diperuntukkan sebanyak RM5 juta untuk menuju sekurang-kurangnya 45 buah PAWE dan menjadikan bilangan di akhir tahun 2019 dijangka berjumlah 133 PAWE. Sehubungan itu, bagi memastikan PAWE kekal relevan menjadi pusat sehenti yang aktif, menarik minat dan penglibatan warga emas, Kementerian telah merangka pelbagai program bagi tahun 2019 seperti berikut:

- i. Melaksanakan projek rintis bagi penubuhan PAWE baharu dan kerjasama program dengan Institut Pengajian Tempatan seperti Universiti Islam Antarabangsa Malaysia (UIA), Universiti Putra Malaysia (UPM), Universiti Multimedia Malaysia (MMU) dan Universiti Kebangsaan Malaysia bagi menarik minat golongan warga emas profesional untuk terlibat dalam aktiviti PAWE;
- ii. Melaksanakan program pemerkasaan ekonomi (EEP) melalui projek 1 PAWE 1 Produk bagi memastikan warga emas di PAWE sentiasa aktif dan produktif;
- iii. Meluaskan program PAWE kepada warga emas dalam kalangan Orang Asli melalui kerjasama strategik bersama Jabatan Kemajuan Orang Asli (JAKOA);

## **SOALAN NO. 43**

- iv. Melaksanakan projek rintis PAWE sebagai *One Stop Centre* bagi pemandanan pekerjaan dan pemerkasaan ekonomi warga emas;
- v. Memperkasakan Pertubuhan Sukarela Kebajikan (PSK) PAWE untuk mengadakan pelbagai program / seminar / forum bagi meningkatkan pengetahuan, kesedaran dan kemahiran berkaitan warga emas kepada komuniti;
- vi. Mengembangkan lagi program Pembelajaran Sepanjang Hayat yang meliputi aspek kerohanian, kesihatan dan ekonomi;
- vii. Mewujudkan Para Kaunselor dalam kalangan ahli PAWE;
- viii. *Golden Mind Program* yang menyediakan platform perkongsian idea, kepakaran dan pengalaman warga emas ke arah pembangunan warga emas;
- ix. Program *Training of the Trainers* untuk WESIHAT kerjasama bersama UKM iaitu ahli PAWE sebagai *trainer* bagi menyampaikan maklumat tentang kesihatan yang menjurus untuk mengelakkan masalah kognitif (dimentia) serta dapat mengesan masalah kognitif yang ringan; dan
- x. Program integgenerasi yang bertujuan mengoptimumkan pengetahuan dan kemahiran warga emas untuk pembangunan komuniti serta merapatkan jurang antara warga emas dan golongan muda.

Adalah diharapkan melalui program-program ini dapat menarik pertambahan bilangan warga emas dan menjadikan PAWE sebagai pusat sehenti yang memberi manfaat kepada warga emas.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. DATUK SERI HAJI AHMAD BIN HAJI MASLAN**  
**[PONTIAN]**  
**TARIKH : 02 APRIL 2019 (SELASA)**

**SOALAN NO. 44**

**Y.B. DATUK SERI HAJI AHMAD BIN HAJI MASLAN [ PONTIAN ]** minta **MENTERI KEWANGAN** menyatakan peratusan kenaikan harga kepada 6405 barang dan semua perkhidmatan yang dikenakan SST. Pecahkan 6405 barang itu kepada kategori dan langkah-langkah untuk mengawal kenaikan harganya.

**JAWAPAN**

Tuan Yang di-Pertua,

Untuk makluman Ahli Yang Berhormat, skop pengenaan cukai jualan dan cukai perkhidmatan di bawah sistem SST yang baharu adalah lebih kecil berbanding di bawah sistem GST di mana pelbagai jenis barang dan keperluan asas pengguna seperti barang makanan asas tidak dikenakan cukai jualan manakala cukai perkhidmatan hanya dikenakan ke atas beberapa jenis perkhidmatan tertentu sahaja. Antara barang yang dikecualikan dari cukai jualan termasuklah makanan asasi seperti beras, gula, ikan segar, ayam segar, sayur-sayuran dan buah-buahan. Kerajaan juga telah menetapkan sebahagian besar barang kegunaan industri seperti besi, kayu dan bahan kimia dikecualikan dari dikenakan cukai jualan.

Sejak SST dilaksanakan pada 1 September 2018, Kementerian Kewangan dengan kerjasama JKDM telah meneliti segala maklum balas dan rayuan daripada pihak industri dan perniagaan serta rakyat awam dan membuat keputusan untuk mengecualikan beberapa barang daripada dikenakan cukai SST serta menyemak semula kadar cukai jualan ke atas barang tertentu. Ini bermakna, skop pengenaan cukai jualan adalah jauh lebih kecil berbanding GST dan pendekatan mengecilkan skop ini telah dapat membantu mengurangkan beban kos sara hidup rakyat. Jangkaan kutipan hasil SST adalah sekadar RM21 bilion setahun berbanding dengan hasil GST sebanyak RM44 bilion yang dijangka dikutip pada tahun 2018. Beban cukai SST ke atas pengguna adalah jauh lebih rendah kerana RM23 bilion telah dikembalikan kepada rakyat dalam bentuk cukai yang lebih kecil. Kekurangan bayaran cukai ini tentu bermakna bahawa rakyat akan mempunyai lebih banyak wang untuk dibelanjakan berbanding dengan dahulu.

Untuk makluman Ahli Yang Berhormat, inflasi tahun 2018 yang berpurata 1.0% tahun-ke-tahun merupakan kadar terendah yang dicatatkan dalam tempoh 9 tahun. Dalam 4 bulan yang pertama di bawah pentadbiran yang terdahulu, purata kadar inflasi ialah 1.7% tahun-ke-tahun. Ini berbeza dengan 8 bulan

pertama pentadbiran Pakatan Harapan, apabila ia menurun secara signifikan kepada 0.6% tahun-ke-tahun. Kadar inflasi juga telah mencatatkan penurunan sebanyak 0.7% bagi bulan Januari 2019 berbanding dengan bulan yang sama tahun lepas. Ini menampilkkan kesan positif pemansuhan GST dan pengenalan semula SST pada harga pengguna.

Kementerian Perdagangan Dalam Negeri Dan Hal Ehwal Pengguna (KPDNHEP) telah melaksanakan Pemantauan Harga Khas SST melibatkan kutipan data harga 900 barang keperluan pengguna terpilih bermula bulan September 2018. Analisa perubahan harga ini dibandingkan antara bulan Mei 2018 dan Disember 2018 bagi melihat kesan pelaksanaan cukai jualan dan cukai perkhidmatan terhadap kedudukan harga barang di pasaran. Berdasarkan analisa tersebut, secara purata, 63.20% daripada 900 barang telah mencatatkan penurunan harga.

Bagi memastikan harga barang di pasaran adalah berpatutan, Kerajaan melalui KPDNHEP akan terus memantau pergerakan harga barang keperluan pengguna di pasaran di samping menguatkuasakan Akta Kawalan Harga dan Antipencatutan (AKHAP) 2011 dan melaksanakan langkah penguatkuasaan pencatutan ke atas perniagaan.

**PEMBERITAHUAN PERTANYAAN LISAN DEWAN RAKYAT**

---

**PERTANYAAN : LISAN**

**DARIPADA : TUAN ALI ANAK BIJU [ SARATOK ]**

**TARIKH : 2.4.2019 (SELASA)**

**SOALAN NO. 45**

**Tuan Ali anak Biju [ Saratok ]** minta **MENTERI PENDIDIKAN** menyatakan apakah langkah-langkah pihak Kementerian untuk mengawal selia hutang 1 bilion Kerajaan Negeri, yang diluluskan pengunaan bagi tujuan membaik pulih sekolah-sekolah daif di Sarawak. Berapa buah sekolah daif di Sarawak, khususnya P2015 Saratok.

## **JAWAPAN**

Tuan Yang di-Pertua,

Kementerian Pendidikan Malaysia (KPM) sentiasa komited dan berusaha untuk menyediakan infrastruktur yang kondusif untuk sesi pengajaran dan pembelajaran murid dan guru dalam keadaan selesa. Berhubung tawaran dana pembiayaan berjumlah RM1 bilion oleh Kerajaan Sarawak kepada Kerajaan Persekutuan bagi membantu untuk menaik taraf bangunan sekolah daif di Sarawak, perkara ini masih dalam perbincangan. Kerajaan masih meneliti tawaran terbabit daripada pelbagai aspek termasuk menentukan mekanisma pembiayaan sama ada secara pinjaman atau hapus kira hutang.

Sebagai persediaan awal, perbincangan antara KPM dan Kementerian Kewangan telah diadakan untuk merangka hala tuju tawaran daripada Kerajaan Sarawak tersebut. KPM pada umumnya mengalu-alukan tawaran terbabit memandangkan keperluan untuk menaik taraf sekolah-sekolah di Sarawak yang mempunyai bangunan daif adalah amat besar. Cadangan ini dilihat dapat memberikan manfaat kepada para pelajar dan selaras dengan Pelan Pembangunan Pendidikan Malaysia 2013-2025 yang menetapkan penyediaan persekitaran pembelajaran yang selamat serta kondusif bagi pengajaran dan pembelajaran.

KPM sedang merangka garis panduan terhadap mekanisme pelaksanaan serta pemantauan bagi memastikan manfaat diterima sebaiknya oleh para pelajar. Bilangan dan senarai bangunan sekolah yang akan dinaik taraf telah dikenal pasti dan akan dinyatakan setelah mekanisme pembiayaan dimuktamadkan.

Sekian, terima kasih

RJM 109

**PEMBERITAHUAN PERTANYAAN LISAN DEWAN RAKYAT**

---

**PERTANYAAN : LISAN**

**DARIPADA : DATUK ALEXANDER NANTA LINGGI  
[ KAPIT ]**

**TARIKH : 2.4.2019 (SELASA)**

**SOALAN NO. 46**

**Datuk Alexander Nanta Linggi [ Kapit ]** minta **MENTERI PENDIDIKAN** menyatakan kaedah yang akan diguna untuk melaksanakan peruntukan sebanyak RM1 bilion yang telah dipersetujui oleh Menteri semasa mengunjungi Ketua Menteri Sarawak pada 19 Februari 2019.

**JAWAPAN**

Tuan Yang di-Pertua,

Kementerian Pendidikan Malaysia (KPM) sentiasa komited dan berusaha untuk menyediakan infrastruktur yang kondusif untuk sesi pengajaran dan pembelajaran murid dan guru dalam keadaan selesa. Berhubung tawaran dana pembiayaan berjumlah RM1 bilion oleh Kerajaan Sarawak kepada Kerajaan Persekutuan bagi membantu untuk menaik taraf bangunan sekolah daif di Sarawak, perkara ini masih dalam perbincangan. Kerajaan masih meneliti tawaran terbabit daripada pelbagai aspek termasuk menentukan mekanisma pembiayaan sama ada secara pinjaman atau hapus kira hutang.

Sebagai persediaan awal, perbincangan antara KPM dan Kementerian Kewangan telah diadakan untuk merangka hala tuju tawaran daripada Kerajaan Sarawak tersebut. KPM pada umumnya mengalu-alukan tawaran terbabit memandangkan keperluan untuk menaik taraf sekolah-sekolah di Sarawak yang mempunyai bangunan daif adalah amat besar. Cadangan ini dilihat dapat memberikan manfaat kepada para pelajar dan selaras dengan Pelan Pembangunan Pendidikan Malaysia 2013-2025 yang menetapkan penyediaan

## **SOALAN NO : 46**

persekitaran pembelajaran yang selamat serta kondusif bagi pengajaran dan pembelajaran.

KPM sedang merangka garis panduan terhadap mekanisme pelaksanaan serta pemantauan bagi memastikan manfaat diterima sebaiknya oleh para pelajar. Bilangan dan senarai bangunan sekolah yang akan dinaik taraf telah dikenal pasti dan akan dinyatakan setelah mekanisme pembiayaan dimuktamadkan.

Sekian, terima kasih

RJM 111

**PEMBERITAHUAN PERTANYAAN JAWAB LISAN DEWAN RAKYAT**

**PERTANYAAN : JAWAB LISAN**

**DARIPADA : YB PUAN ALICE LAU KIONG YIENG  
[ LANANG ]**

**TARIKH : 2 APRIL 2019**

**SOALAN : 47**

**Puan Alice Lau Kiong Yieng [ Lanang ]** minta **MENTERI DALAM NEGERI** menyatakan status siasatan kes di mana seorang anggota polis di Sarikei didakwa merogol seorang perempuan berumur 19 tahun di balai polis Sarikei pada bulan Oktober 2018 dan kenapa tiada tindakan diambil berkenaan kes itu sehingga sekarang.

**JAWAPAN**

Tuan Yang di-Pertua,

Pihak PDRM telah menjalankan siasatan berkaitan Sarikei Report 3337/18 bertarikh 29 Oktober 2018 mengenai dakwaan seorang gadis telah dirogol di dalam tandas Balai Polis Sarikei pada bulan Oktober 2018. Suspek seorang anggota polis telah dituduh di mahkamah pada 27 Februari 2019 di bawah seksyen 376 dan seksyen 354 Kanun Keseksaan.

**PEMBERITAHUAN PERTANYAAN DEWAN RAKYAT**

**PERTANYAAN :** LISAN

**DARIPADA :** TUAN AHMAD FADHLI BIN SHAARI  
[PASIR MAS]

**TARIKH :** 2 APRIL 2019 (SELASA)

**SOALAN :** 48

**Tuan Ahmad Fadhli bin Shaari [Pasir Mas]** minta **PERDANA MENTERI** menyatakan perkembangan siasatan SPRM ke atas PAS yang dikatakan menerima dana sebanyak RM90 juta daripada UMNO sebelum Pilihan Raya Umum ke 14 yang lalu.

**JAWAPAN:** YB TUAN MOHAMED HANIPA BIN MAIDIN  
TIMBALAN MENTERI DI JABATAN PERDANA  
MENTERI

Yang Berhormat,

Untuk makluman Yang Berhormat Pasir Mas, siasatan melibatkan isu RM90 juta terhadap PAS masih lagi dijalankan dan SPRM sedang memanggil individu-individu yang tertentu bagi membantu siasatan terperinci dijalankan. Di peringkat siasatan ini, adalah tidak wajar mana-mana pihak membuat apa-apa kesimpulan atau spekulasi terhadap isu ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : TUAN WONG TACK [BENTONG]**

**TARIKH : 2 APRIL 2019 (SELASA)**

**SOALAN NO. 49**

Minta **MENTERI KESIHATAN** menyatakan sama ada projek Hospital Pakar di Cinta Manis, Karak masih diteruskan. Jika ya bilakah pembinaan dijangka bermula dan siap.

**JAWAPAN**

**Yang di-Pertua,**

Cadangan asal pembinaan hospital pakar di Cinta Manis, Karak, Bentong merupakan salah satu hospital yang telah diputuskan untuk dilaksanakan secara Kerjasama Awam Swasta oleh Jemaah Menteri pada 2012. Namun demikian, Jemaah Menteri pada 2014 telah memutuskan pembatalan pelaksanaan projek yang dikendalikan secara Kerjasama Awam-Swasta dan memutuskan supaya projek ini dilaksanakan melalui peruntukan pembangunan berfasa di bawah Rancangan Malaysia Ke Sebelas (RMK 11) tertakluk kepada kemampuan kewangan kerajaan.

Kementerian ini telah menyusun semula keutamaan pembinaan hospital-hospital baru (termasuk Hospital Bentong) dan berpandangan bahawa belum terdapat keperluan mendesak terhadap Hospital Baru Bentong bagi menggantikan hospital sedia ada. Antara lain kerana:

- i. KKM telah diberikan peruntukan sebanyak RM60 juta untuk membina sebuah blok tambahan Hospital Bentong Blok (2 wad) dan telah pun mula beroperasi pada 2014 menjadikan kapasiti Hospital Bentong sebanyak 152 katil daripada 90 katil;

- ii. Sebuah dewan bedah (*modular OT*) baharu yang telah disiapkan pada tahun 2015 dengan kos RM4.6 juta juga belum berfungsi secara optimum kerana belum ada residen pakar pembedahan;
- iii. Kadar penggunaan katil yang rendah sekitar 45 % (2012-2017);
- iv. Terdapat hanya lima residen pakar di hospital ini iaitu dalam bidang kecemasan, perubatan, psikiatri dan kanak-kanak. Perkhidmatan kepakaran lain diberikan melalui lawatan pakar di mana kekerapannya boleh dipertingkatkan untuk mengoptimakan kemudahan sedia ada; dan
- v. Hospital sedia ada masih mampu menampung keperluan perkhidmatan kesihatan bagi penduduk setempat .

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KEDUA  
PARLIMEN KEEMPAT BELAS**

**PERTANYAAN : LISAN**

**DARIPADA : DATO' HAJI ABDUL RAHMAN BIN MOHAMAD  
[LIPIS]**

**TARIKH : 2 APRIL 2019 (SELASA)**

**SOALAN NO. 50**

Minta **MENTERI PENGANGKUTAN** menyatakan jumlah kamera AES yang baru ditambah setakat ini untuk menjamin keselamatan pengguna jalan raya.

**JAWAPAN**

Yang Di-pertua,

1. Untuk makluman Yang Berhormat, sehingga 1 Mac 2019, sebanyak empat puluh lima (45) kamera *Automated Enforcement System* (AES) telah beroperasi iaitu empat (4) lokasi di negeri Johor, empat (4) lokasi di negeri Melaka, enam (6) lokasi di negeri Selangor, tujuh (7) lokasi di negeri Kedah, satu (1) lokasi di negeri Pulau Pinang, lima belas (15) lokasi di negeri Perak, dua (2) lokasi di Negeri Sembilan, dua (2) lokasi di negeri Terengganu, satu (1) lokasi di negeri Kelantan, dua (2) lokasi di negeri WPKL dan satu (1) lokasi di Putrajaya.
2. Analisis pihak MIROS menggunakan data kemalangan dari PDRM dan Lembaga Lebuh raya Malaysia menunjukkan terdapat pengurangan 25% kes kemalangan di 21 lokasi kamera had laju AES di lebuh raya pada tahun 2018 berbanding tahun 2017. Selain dari itu kajian pihak MIROS juga menunjukkan impak pelaksanaan AES di enam lokasi rintis telah menunjukkan secara puratanya kadar kepatuhan yang tinggi bagi had laju iaitu 95% berbanding sebelumnya 63%. Bagi empat lokasi rintis lampu isyarat yang di pasang kamera AWaS pula, kadar pematuhan lampu isyarat juga telah meningkat dari 96% kepada 98%. Dengan peningkatan ketara dalam pematuhan had laju dan lampu isyarat menunjukkan AES mampu melahirkan pemandu yang berhemah yang patuh kepada peraturan lalu lintas.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT**

**PERTANYAAN : JAWAB LISAN**

**DARIPADA : DATO' SERI ANWAR BIN IBRAHIM  
[ PORT DICKSON ]**

**TARIKH : 2 APRIL 2019**

**SOALAN : Dato' Seri Anwar bin Ibrahim**  
[ Port Dickson ] minta **MENTERI LUAR NEGERI** menyatakan langkah yang diambil oleh Kerajaan untuk menyelesaikan masalah Rohingya secara menyeluruh dalam kerangka ASEAN dan jaminan kerakyatan kepada mereka serta menghentikan penindasan Kerajaan Myanmar.

**JAWAPAN**

Tuan Yang di-Pertua,

Saya mengucapkan terima kasih kepada Yang Berhormat Port Dickson di atas pertanyaan yang dikemukakan.

Tuan Yang di-Pertua,

2. Di Sesi Pemukiman Menteri-menteri Luar ASEAN yang telah diadakan di Chiang Mai, Thailand pada Januari 2019 yang lalu, YB Menteri Luar Negeri dan rakan-rakan sejawatan ASEAN telah bersetuju supaya ASEAN diberikan peranan yang lebih (enhanced) dan yang dapat dilihat (visible) berkaitan dengan keadaan di Wilayah Rakhine, demi menyokong usaha-usaha Myanmar. Peranan ini meliputi isu-isu seperti bantuan kemanusiaan, sokongan untuk penghantaran balik golongan tersasar (displaced persons), dan bantuan pembangunan mampan di Wilayah Rakhine.

3. Mengenai isu repatriasi, beberapa negara anggota ASEAN melihat bahawa tidak mungkin proses penghantaran balik akan berlaku dalam masa terdekat kerana kekurangan kepercayaan dan keyakinan oleh golongan tersasar itu sendiri. Usaha harus dilakukan oleh kedua-dua pihak iaitu Myanmar dan Bangladesh untuk memastikan kembalinya golongan tersasar ini adalah secara sukarela dan bermaruah.

4. Dalam hal ini, sesetengah negara anggota ASEAN berpendapat adalah lebih berguna jika Myanmar memanfaatkan peranan ASEAN dalam memperbaiki keadaan di Wilayah Rakhine, termasuk dengan mempromosikan langkah-langkah membina keyakinan dan/atau menyediakan bantuan pembangunan jangka panjang.

5. Sebahagian daripada langkah-langkah membina keyakinan ini termasuk golongan tersasar yang berpotensi untuk pulang melawat sendiri Wilayah Rakhine untuk melihat persiapan untuk penghantaran balik; serta lawatan oleh wakil-wakil komuniti di Wilayah Rakhine ke Cox's Bazaar.

**Tuan Yang di-Pertua,**

6. Tentang isu kewarganegaraan, ASEAN mengalu-alukan usaha Myanmar untuk berkerjasama (engage) dengan Suruhanjaya Bebas Siasatan (Independent Commission of Enquiry) yang diketuai oleh Duta Besar Rosario Manalo. Malaysia berpendapat bahawa isu kewarganegaraan ini merupakan isu yang asas bagi penyelesaian jangka panjang yang perlu ditangani oleh Myanmar.

**Tuan Yang di-Pertua,**

7. Pada tahun 2017, ASEAN telah menghantar bantuan kemanusiaan melalui AHA Centre kepada golongan tersasar di Maungdaw, Myanmar. Pada November 2018, Kerajaan Myanmar telah menjemput ASEAN melalui AHA Centre untuk menghantar Pasukan Penilaian Keperluan (*Needs Assessment Team*) bagi mengenal pasti keperluan dan bidang kerjasama di Wilayah Rakhine. Negara-negara ASEAN memberi sokongan kepada misi penilaian keperluan ini dan

berharap supaya ia dapat dijalankan sebaik sahaja keadaan keselamatan membenarkan.

**Tuan Yang di-Pertua,**

8. Pendirian Malaysia adalah jelas bahawa kita menggesa Kerajaan Myanmar untuk mencapai penyelesaian dengan segera dan mapan kepada isu etnik Rohingya di Myanmar demi kepentingan keselamatan dan kestabilan rantau ini. Seperti yang pernah kita sebutkan dalam Dewan yang mulia ini, ada tiga perkara yang melibatkan isu Rohingya. Pertama, ialah soal kerakyatan, kewarganegaraan bagi orang Rohingya di Myanmar. Selaras dengan itu, ialah membawa penjenayah-penjenayah ke muka pengadilan. Kedua, penghantaran pulang (repatriation) orang Rohingya dari Bangladesh ke Myanmar. Ketiga, ialah bagaimana kita boleh meningkatkan bantuan-bantuan kemanusiaan yang diberikan oleh kerajaan dan rakyat Malaysia kepada etnik Rohingya sama ada di dalam negara kita sendiri ataupun melalui contohnya, hospital medan yang diuruskan oleh MINDEF di Cox's Bazar, Bangladesh.

9. Ini akan kita teruskan, misalnya, hospital medan di Cox's Bazar, Kabinet telah membuat keputusan hospital ini akan diteruskan sehingga bulan Disember 2019. Di peringkat antarabangsa, kita terus mengetengahkan isu Rohingya sama ada kerangka ASEAN dalam OIC dan juga di PBB.

**Tuan Yang di-Pertua,**

10. Bagi memastikan persahabatan dan kerjasama yang berterusan, ASEAN mengamalkan prinsip tidak campur tangan dalam hal ehwal dalaman dan menghormati kedaulatan Negara-negara Anggotanya seperti yang termaktub di dalam Piagam ASEAN. Piagam ASEAN turut memperuntukkan dengan jelas bahawa ASEAN dan Negara Anggotanya hendaklah menghormati hak setiap Negara Anggotanya untuk memerintah dan mentadbir negaranya sendiri bebas daripada campur tangan luar, perbuatan subversif dan paksaan. Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**  
**DARIPADA : Y.B. DATO' SRI BUNG MOKTAR BIN RADIN**  
**[KINABATANGAN]**  
**TARIKH : 02 APRIL 2019 (SELASA)**

**SOALAN NO. 52**

**Y.B. DATO' SRI BUNG MOKTAR BIN RADIN [ KINABATANGAN ]** minta **MENTERI KEWANGAN** menyatakan:-

- a) apakah perancangan pihak Kerajaan dalam memastikan kos sara hidup rakyat dapat diringankan dan kuasa beli rakyat dapat ditingkatkan; dan
- (b) adakah Kerajaan berhasrat untuk mengembalikan cukai pendapatan yang dipungut di negeri Sabah dikembalikan kepada Kerajaan Negeri sebanyak 40%.

**JAWAPAN**

Tuan Yang di-Pertua,

Kerajaan amat prihatin terhadap kesukaran yang dihadapi oleh rakyat terutama dalam menghadapi kos sara hidup yang semakin meningkat. Sehubungan itu, pelbagai program dan bantuan telah dirancang dan dilaksanakan bagi membantu meringankan beban kos sara hidup dan meningkatkan kuasa beli rakyat.

Untuk makluman Ahli Yang Berhormat, kemampuan membeli oleh rakyat secara umumnya dipengaruhi oleh dua faktor iaitu tahap pendapatan dan harga barang dan perkhidmatan. Dalam usaha untuk membantu meringankan beban peningkatan kos sara hidup, Kerajaan melalui Belanjawan 2019 yang lalu telah mengumumkan pelbagai inisiatif, termasuklah:

- Bantuan Sara Hidup (BSH) sebanyak RM1,000 kepada isi rumah berpendapatan bulanan RM2,000 dan ke bawah, RM750 kepada isi rumah berpendapatan bulanan dari RM2,001 hingga RM3,000 dan RM500 kepada isi rumah berpendapatan bulanan dari RM3,001 hingga RM4,000. Sebagai tambahan, semua penerima BSH juga akan diberikan RM120 untuk setiap anak berumur 18 tahun ke bawah terhad kepada empat orang, kecuali anak OKU yang tidak dihadkan umur mereka. Selain itu, tambahan sebanyak RM100 juga diberikan kepada individu yang berdaftar di bawah kategori bujang dalam pengkalan data BSH 2018;
- menurunkan harga runcit petrol RON95 daripada RM2.20 seliter kepada RM2.08 seliter;
- menstabilkan bekalan dan menyeragamkan harga barang keperluan asas, terutama di Sabah dan Sarawak dengan memperuntukkan sebanyak RM150 juta melibatkan barang seperti tepung gandum, gula bertapis dan minyak masak dalam paket 1kg, serta beras tempatan 15% hancur pek 10kg, Petrol RON95, diesel dan LPG;

- memperkenalkan skim caruman Kumpulan Wang Simpanan Pekerja (KWSP) i-SURI dengan geran padanan berjumlah RM40 setiap bulan sebagai insentif kepada suami yang mencarum dengan kadar minimum RM5 sebulan kepada simpanan persaraan isteri;
- meningkatkan perkhidmatan penjagaan kesihatan di hospital dan klinik Kerajaan yang berkualiti untuk rakyat dengan kos sebahagian besarnya ditanggung oleh Kerajaan;
- meningkatkan bilangan rumah mampu milik bagi membolehkan rakyat terutama golongan B40 memiliki rumah;
- memastikan bekalan barang makanan mencukupi;
- mengkaji semula pengenaan tol bagi mengurangkan beban rakyat;]
- menanggung sebahagian besar kos persekolahan termasuk memberi pelbagai bantuan seperti bantuan makanan, buku teks dan bantuan geran perkapita;
- meningkatkan liputan dan kualiti pengangkutan awam di bandar besar mahupun kawasan luar bandar. Ini termasuklah dengan mengembangkan perkhidmatan e-hailing dan memastikan pertambahan unit bas awam seluruh negara dan memperbaiki perkhidmatan bas awam. Sementara itu, projek-projek pengangkutan yang kurang memberi faedah kepadarakyat dan negaradikaji semula;
- menggantikan sistem cukai barang dan perkhidmatan (GST) kepada cukai jualan dan perkhidmatan (SST) bermula 1 September 2018. Di bawah SST, hanya 38% barang dan perkhidmatan dalam Indeks Harga Pengguna (IHP) dikenakan cukai berbanding 60% di bawah GST. Secara keseluruhannya, penjimatan daripada pengenalan semula SST bagi menggantikan GST boleh digunakan oleh rakyat untuk menampung perbelanjaan barang keperluan mereka yang lain; dan
- terus membantu rakyat dalam kalangan B40 meringankan kos sara hidup terutama dari segi kos penjagaan kesihatan, Kerajaan telah mengumumkan pelaksanaan Skim Perlindungan Insuran MySalam untuk

membolehkan mereka menerima perlindungan daripada 36 penyakit kritikal termasuk barah, serangan jantung dan Alzheimer. Skim yang bermula 1 Januari 2019 ini dijangka akan memberi manfaat kepada kira-kira 3.69 juta orang.

Dari segi meningkatkan pendapatan rakyat pula, Kerajaan telah mengumumkan beberapa langkah dalam Belanjawan 2019 termasuk:

- penyelarasan gaji minimum kepada RM1,100 di seluruh negara mulai 1 Januari 2019 dengan peningkatan sebanyak hampir 20% di Sabah dan Sarawak;
- bantuan kepada pekebun kecil getah melalui Insentif Pengeluaran Getah (IPG) di mana harga lantai getah dinaikkan dari RM2.20 kepada RM2.50 sekilogram dengan peruntukan sebanyak RM50 juta, bagi membantu mengurangkan kesan kejatuhan harga getah;
- bantuan kepada petani melalui insentif harga padi di mana harga subsidi padi dinaikkan dari RM300 setan kepada RM360 setan dengan peruntukan sebanyak RM648 juta;
- menyediakan peruntukan sebanyak RM30 juta bagi membantu semua pekebun kecil kelapa sawit mendapatkan pengiktirafan persijilan *Malaysian Sustainable Palm Oil* (MSPO) yang seterusnya meningkatkan kebolehpasaran komoditi tersebut ke luar negara.

Tuan Yang Dipertua,

Kerajaan akan terus meneliti insentif dan bantuan yang telah dilaksanakan bagi meringankan beban kos sara hidup rakyat dan dalam masa yang sama menambah pendapatan mereka bagi meningkatkan kuasa beli mereka. Sehubungan itu, inisiatif dan program baharu yang lebih efektif, menyeluruh dan memenuhi keperluan rakyat akan terus dirangka dan dilaksanakan dari semasa ke semasa.

Tuan Yang di-Pertua,

Mengenai samada Kerajaan berhasrat untuk mengembalikan cukai pendapatan yang dipungut di negeri Sabah dikembalikan kepada kerajaan negeri sebanyak 40%, Kerajaan Persekutuan perlu meneliti dengan lebih terperinci isu-isu yang dibangkitkan serta mengambil kira kemampuan serta kedudukan kewangan semasa Kerajaan Persekutuan. Dalam hal ini, Kerajaan juga telah bersetuju dengan penubuhan Jawatankuasa Khas Kabinet untuk Menyemak Pelaksanaan Perjanjian Malaysia 1963.

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : DATUK DR. HAJI ABD. LATIFF BIN AHMAD  
[ MERSING ]**

**TARIKH : 2.4.2019 (SELASA)**

**Datuk Dr. Haji Abd. Latiff Bin Ahmad [ Mersing ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah tindakan Kementerian terhadap pengusaha restoran atau kedai makan bukan Islam yang mempamerkan ayat-ayat suci Al-Quran bagi menarik pelanggan di kalangan orang Islam dan adakah pengusaha restoran berkenaan menggunakan sijil halal palsu.

**JAWAPAN**

**Tuan Yang Di-Pertua,**

Kementerian Perdagangan Dalam Negeri dan Hal Ehwal Pengguna (KPDNHEP) sentiasa mengambil tindakan tegas kepada mana-mana pemilik restoran yang menyalahgunakan representasi agama Islam, termasuk perbuatan menggantung ayat suci Al-Quran bagi tujuan memperdaya atau mengelirukan pengguna. Perbuatan tersebut adalah menjadi satu kesalahan yang serius di bawah Perintah Perihal Dagangan (Takrif Halal) 2011 yang mana jika disabitkan kesalahan, syarikat tersebut boleh dikenakan denda sehingga RM 5 juta.

Bagi menangani isu-isu halal seperti ini, Kementerian mengambil tindakan-tindakan seperti berikut:

- a) Membuat **hebahan umum** mengenai pematuhan perundangan halal melalui media sosial rasmi Kementerian dan menerbitkan kenyataan media;

- b) Memberi kesedaran mengenai halal kepada pengguna dan pelajar di program-program **advokasi** anjuran Kementerian dan agensi berkaitan;
- c) **Menubuh dan mempergerusikan** Jawatankuasa Penyelarasan Perundangan dan Penguatkuasaan Halal di peringkat nasional;
- d) Menjalankan **pemeriksaan halal secara berkala** di tempat-tempat penyembelihan, kilang pemprosesan dan premis-premis makanan;
- e) Menjalankan **pemeriksaan halal bersempena bulan Ramadan** di premis-premis makanan yang menyediakan juadah berbuka puasa; dan
- f) Menjalankan **operasi khas secara bersepakutu** dengan agensi-agensi Kerajaan di premis makanan.

**SOALAN NO. 54**

**PEMBERITAHUAN PERTANYAAN LISAN DEWAN RAKYAT**  
**MESYUARAT PERTAMA, PENGGAL KEDUA**  
**PARLIMEN KEEMPAT BELAS**

**PERTANYAAN : JAWAB LISAN**  
**DARIPADA : TUAN MOHD SHAHAR BIN ABDULLAH**  
**[ PAYA BESAR ]**  
**TARIKH : 2 APRIL 2019 (SELASA)**

**SOALAN NO. 54**

Tuan Mohd Shahar Bin Abdullah [ Paya Besar ] minta **MENTERI PEMBANGUNAN WANITA, KELUARGA DAN MASYARAKAT** menyatakan apakah perancangan Kementerian mewajibkan semua premis institusi awam dan pusat beli belah untuk menyediakan "nursing room" untuk memudahkan urusan ibu-ibu yang mempunyai anak kecil.

**JAWAPAN**

Tuan Yang di-Pertua,

Kerajaan mengakui menghadapi cabaran besar untuk memastikan wanita terus kekal dalam pekerjaan dan dalam masa yang sama, Kerajaan turut inginkan ibu-ibu yang bekerja untuk menyusui anak dengan susu ibu secara eksklusif dari lahir hingga berusia enam (6) bulan serta meneruskannya hingga mencapai umur dua tahun. Bagi ibu yang bekerja, cabaran adalah sangat besar untuk kekal bekerja dan memastikan anak dapat menyusu dengan susu ibu secara eksklusif. Justeru, Kementerian menggesa agar pemilik institusi awam, pusat beli-belah serta majikan untuk menyediakan bilik penyusuan, mewujudkan peraturan yang mengupayakan dan memberi fleksibiliti kepada penyusuan susu ibu.

Kementerian juga sentiasa mengalakkan penyertaan NGO untuk memberi kesedaran dan bantuan kepada ibu-ibu terutamanya ibu muda dalam meneruskan penyusuan susu ibu kepada anak-anak.

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : YB DATO' SERI HAJI MUKHRIZ BIN TUN DR. MAHATHIR [JERLUN]**

**TARIKH : 2 APRIL 2019 (SELASA)**

**SOALAN :**

**Dato' Seri Haji Mukhriz bin Tun Dr. Mahathir [Jerlun]** minta **PERDANA MENTERI** menyatakan dasar Kerajaan mengenai pondok-pondok agama warga emas, perlukah diletakkan di bawah Jabatan Agama, bagi memudahkan aspek pemantauan dan jagaan.

**JAWAPAN : (YB DATO' SERI DR. MUJAHID BIN YUSUF, MENTERI DI JABATAN PERDANA MENTERI)**

Tuan Yang Dipertua,

Sebagaimana Ahli Yang Berhormat sedia maklum, Enakmen Pengawalan Sekolah-Sekolah Agama Islam bagi negeri-negeri merupakan satu peruntukan undang-undang bertujuan untuk mengawal semua institusi pendidikan Islam yang ditubuhkan di negeri berkenaan. Umpamanya Enakmen Pengawalan Sekolah-Sekolah Agama Islam Kedah 1988 memperuntukkan semua institusi pendidikan agama termasuk institusi pengajian pondok yang ditubuhkan oleh pelbagai pihak adalah perlu berdaftar seperti mana yang disebutkan dalam seksyen 12 Pendaftaran. Manakala Seksyen 17 menyebut tentang perlantikan nazir sekolah agama yang menjalankan tugas-tugas seperti berikut:

- (a) untuk menjalankan dari semasa ke semasa pemeriksaan ke atas Sekolah-sekolah Islam tentang pengajaran kurikulum yang

dibenarkan, penggunaan buku-buku teks, guru-guru yang diambil bekerja dan pematuhan yang wajar akan Enakmen ini dan kaedah-kaedah yang dibuat di bawahnya atau arahan-arahan Pendaftar;

- (b) untuk menjalankan penyiasatan ke atas mana-mana Sekolah Islam berhubungan dengan apa-apa perkara yang dibenarkan oleh Pendaftar;
- (c) untuk memeriksa akaun-akaun Sekolah Islam; dan
- (d) untuk melaporkan apa-apa perkara luar aturan dan untuk membuat apa-apa cadangan yang perlu kepada Pendaftar.

Oleh yang demikian, institusi pondok agama warga emas yang ditubuhkan di negeri-negeri adalah tertakluk kepada Enakmen Pengawalan Sekolah-Sekolah Agama Islam bagi negeri berkenaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' SERI MAHDZIR BIN KHALID  
[ PADANG TERAP ]**

**TARIKH : 2 APRIL 2019 (SELASA)**

**SOALAN NO. 56**

Minta **MENTERI HAL EHWAL EKONOMI** menyatakan sejauh manakah Dasar Ekonomi Baru (DEB) telah berjaya merapatkan jurang antara masyarakat dan DEB dapat meningkatkan tahap ekonomi golongan Bumiputera serta apakah perancangan Kementerian untuk meningkatkan lagi tahap ekonomi Bumiputera.

**JAWAPAN**

Yang Di-Pertua,

1. Kerajaan melihat bahawa pelaksanaan dasar dan semangat Dasar Ekonomi Baru (DEB) masih relevan malahan akan terus diperkasa melalui dasar-dasar baharu yang lebih strategik bersesuaian dengan keperluan semasa. Sebagai Kerajaan yang peduli rakyat, pengagihan ekonomi mestilah dilakukan secara adil kepada semua rakyat mengikut keperluan masing-masing.
2. Dalam langkah Kerajaan untuk meneliti semula dasar-dasar utama negara, pembangunan sosioekonomi Bumiputera tetap menjadi agenda nasional tanpa meminggirkan kaum-kaum lain di negara ini. Dalam hal ini, tindakan afirmatif akan diteruskan khususnya untuk membangunkan potensi Bumiputera bagi meningkatkan penyertaan mereka dalam ekonomi negara dan seterusnya mencapai matlamat pengagihan kekayaan yang lebih saksama.
3. Walau bagaimanapun, pencapaian Bumiputera masih rendah berbanding bukan Bumiputera seperti ditunjukkan oleh indikator sosioekonomi berikut:
  - (i) pemilikan ekuiti Bumiputera dalam sektor korporat masih tidak mencapai sasaran 30 peratus pemilikan ekuiti sehingga tahun 2015;
  - (ii) pendapatan purata isi rumah Bumiputera pada tahun 2016 adalah rendah iaitu RM6,267 berbanding bukan Bumiputera sebanyak RM8,213;
  - (iii) peratus kategori pekerjaan mahir antara kaum atau inter etnik pada tahun 2017 bagi Bumiputera adalah sebanyak 29.4 peratus berbanding bukan Bumiputera sebanyak 36.3 peratus; dan

- (iv) peratus transaksi pemilikan kediaman Bumiputera dalam pasaran primer pada tahun 2017 adalah 42.3 peratus (nilai bersamaan RM5.84 bilion) berbanding bukan Bumiputera sebanyak 53.8 peratus (nilai bersamaan RM7.44 bilion) manakala dalam jenis pemilikan komersil, peratus transaksi Bumiputera hanyalah 9.2 peratus (nilai bersamaan RM0.18 bilion) berbanding bukan Bumiputera iaitu 37.5 peratus (nilai bersamaan RM0.74 bilion).
4. Sebagai langkah ke hadapan, Kerajaan akan memastikan kesejahteraan rakyat terus menjadi keutamaan melalui amalan prinsip “*shared prosperity*” iaitu berasaskan keperluan, ketelusan, menyokong pertumbuhan dan kemampanan bagi mendukung dasar pembangunan inklusif dan merapatkan jurang ketidakseimbangan sosioekonomi antara etnik, wilayah dan kelas pendapatan.

Sekian, terima kasih.

Kementerian Hal Ehwal Ekonomi  
2 April 2019

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : PUAN RUBIAH BINTI HAJI WANG  
[KOTA SAMARAHAN]**

**TARIKH : 2 APRIL 2019 (SELASA)**

**SOALAN NO. 57**

Minta **MENTERI HAL EHWAL EKONOMI** menyatakan apakah langkah-langkah yang diambil oleh pihak Kerajaan dalam menangani isu kos sara hidup yang semakin meningkat.

**JAWAPAN**

Yang di-Pertua,

1. Untuk makluman Yang Berhormat, isu kenaikan kos sara hidup sememangnya perlu ditangani secara efektif bagi memastikan kesejahteraan rakyat terus terpelihara. Di antara langkah-langkah yang dilaksanakan oleh Kerajaan melalui Majlis Tindakan Ekonomi (EAC) dan Majlis Tindakan Kos Sara Hidup (NACCOL) di bawah Kementerian Perdagangan Dalam Negeri dan Hal Ehwal Pengguna (KPDNHEP) dalam menangani isu dan cabaran berkaitan dengan kenaikan kos sara hidup adalah seperti berikut;
2. **Pertama:** dalam konteks pengangkutan awam contohnya, Kerajaan telah menawarkan Pas Perjalanan Tanpa Had MY100 dan MY50 mulai 1 Januari 2019 dan diskaun sebanyak 20% tambang Keretapi Tanah Melayu (KTM) Komuter bermula 1 April 2019 kepada semua warganegara Malaysia. Untuk meringankan kos kehidupan mahasiswa, Kerajaan memperluaskan program *Food Bank Malaysia* di bawah seliaan KPDNHEP ke semua Institusi Pengajian Tinggi menerusi Yayasan Foodbank Malaysia.
3. **Kedua:** menambah baik Bantuan Sara Hidup (BSH) supaya lebih bersasar dalam menjamin kebajikan dan kualiti hidup isi rumah B40.

4. **Ketiga:** penetapan harga siling petrol RON95 pada RM2.08 seliter. Ini bermakna harga runcit RON95 akan dihadkan kepada RM2.08 seliter walaupun harga minyak dunia meningkat lebih daripada itu.
5. **Keempat:** pelaksanaan Skim Perlindungan Kesihatan (PeKa) bagi B40 berumur 50 tahun ke atas dan yang layak menerima BSH oleh Kementerian Kesihatan.
6. **Kelima:** Kerajaan juga telah menubuhkan Jawatankuasa Peringkat Menteri bagi mengkaji semula Dasar Monopoli Perkhidmatan dan Bekalan yang dipengerusikan oleh YB Menteri Hal Ehwal Ekonomi. Jawatankuasa ini akan mengenal pasti perjanjian konsesi perkhidmatan dan bekalan yang bersifat monopoli serta merancang perubahan dasar dan strategi yang bersesuaian. Usaha ini adalah untuk mencipta pasaran yang lebih efektif yang mesra pasaran dan berdaya saing.

Sekian, terima kasih.

Kementerian Hal Ehwal Ekonomi

2 April 2019

**PEMBERITAHUAN PERTANYAAN JAWAB LISAN DEWAN RAKYAT**

**PERTANYAAN : JAWAB LISAN**

**DARIPADA : TUAN KHOO POAY TIONG [ KOTA MELAKA ]**

**TARIKH : 2 APRIL 2019**

**SOALAN : 58**

**Tuan Khoo Poay Tiong [ Kota Melaka ]** minta **MENTERI DALAM NEGERI** menyatakan jadual pergerakan (itinerary), hasil, dan pencapaian lawatan kerja oleh Ketua Polis Negara dan pegawai-pegawaiannya ke negara Turki pada Februari 2019 mengenai masalah perjudian online.

**JAWAPAN**

Tuan Yang di-Pertua,

Lawatan kerja yang dibuat oleh pihak PDRM ke Istanbul, Turki pada 8hb hingga 11hb Februari 2019 yang diketuai oleh Ketua Polis Negara bersama 12 orang lagi Pegawai Kanan Polis adalah lawatan rasmi yang telah mendapat kelulusan daripada Kementerian Dalam Negeri.

Lawatan kerja sambil belajar ini ditaja oleh Lembaga Totalisator Malaysia (LTM) yang merupakan sebuah badan berkanun yang ditubuhkan mengikut Akta Perlumbaan (Lembaga Totalisator) 1961 yang diletakkan di bawah seliaan Kementerian Kewangan Malaysia. PDRM mempunyai hubungan secara langsung dengan LTM yang berperanan untuk menasihati LTM tentang amalan terbaik (*best practices*) dalam menangani kegiatan bookie haram di kelab-kelab lumba kuda di Malaysia.

Setiap tahun bermula pada tahun 2012, LTM akan memperuntukan sejumlah bajet kepada PDRM untuk tujuan lawatan kerja atau membuat penyelidikan bagi penambahbaikan industri perlumbaan kuda seperti yang dihuraikan di bawah seksyen 4 Akta Perlumbaan (Lembaga Totalisator) 1961. Ahli Lembaga Pengarah LTM boleh meluluskan

## **SOALAN NO : 58**

peruntukan tanpa perlu merujuk kepada Menteri Kewangan untuk kelulusan. Lawatan kerja yang pernah diluluskan oleh LTM kepada PDRM seperti berikut :

- i) 12-17 Jun 2012 – Lawatan ke Hong Kong melibatkan 15 orang delegasi daripada Jabatan Siasatan Jenayah dengan peruntukan sejumlah RM 69,763.00;
- ii) 10-14 Jun 2013 – Lawatan Ke Australia melibatkan 10 orang delegasi daripada Jabatan Siasatan Jenayah dengan peruntukan sejumlah RM 95,040.00;
- iii) 1- 6 Mei 2014- Lawatan Ke Turki, melibatkan 8 orang delegasi daripada Jabatan Siasatan Jenayah dengan peruntukan RM 128,400.00; dan
- iv) Pada 16 Mac 2017 - Ahli Lembaga Pengarah LTM telah meluluskan peruntukan RM 184,648.00, namun atas sebab kesibukan dan kekangan penugasan, PDRM terpaksa menunda lawatan pada tahun berkenaan dan hanya berkesempatan membuat lawatan pada 8-11 Februari 2019 baru-baru ini ke Turki melibatkan 13 orang Pegawai Kanan Polis yang diketuai oleh Ketua Polis Negara sendiri.

Menyentuh hasil dan manfaat yang diperolehi sepanjang lawatan tersebut, terdapat tiga (3) sesi lawatan telah diadakan bersama Pihak Berkuasa Turki, Antara lokasi lawatan kerja yang diadakan adalah seperti berikut:-

- 1) Lawatan ke Ibu Pejabat Istanbul Provincial Police;
- 2) Lawatan ke Veliefendi Race Course; dan
- 3) Lawatan ke Bangunan Jockey Club of Turkey (TJK).

## **SOALAN NO : 58**

Objektif lawatan yang diatur ke lokasi berkenaan kerana mempunyai kaitan dengan penugasan dalam negara seperti berikut:-

- i) Mengadakan perbincangan dua hala antara PDRM dan Pihak Berkuasa Turki mengenai kaedah pembanterasan, dan menangani aktiviti pertaruhan haram secara “on course” atau “off Course” di kelab-kelab lumba kuda;
- ii) Mendalami isu-isu berkaitan pendakwaan dan pembuktian kes yang dihadapi oleh Pihak Berkuasa Turki dan kaedah yang digunakan bagi mengatasi masalah berkenaan;
- iii) Mengeratkan hubungan dua hala dan kerjasama dengan pihak berkuasa Negara Turki dalam menangani jenayah rentas sempadan dan isu-isu jenayah terkini; dan
- iv) Meningkatkan kualiti siasatan dengan mengambil pendekatan digunakan oleh negara luar dari segi penggubalan undang-undang baru dan penggunaan teknologi terkini selaras dengan peredaran masa.

Lawatan ini juga tidak menimbulkan sebarang konflik kepentingan (*Conflict of Interest*) memandangkan rangka kerja lawatan adalah untuk mencari pendekatan baru yang digunakan oleh negara luar sebagai penanda aras untuk diaplikasikan dalam negara bagi pembanterasan pertaruhan haram di kelab lumba kuda. Di samping itu, lawatan ini adalah teratur dengan menggunakan peruntukan yang dibenarkan oleh undang-undang dan mengikut segala prosedur yang ditetapkan.

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : DATO' TUAN IBRAHIM TUAN MAN**

**TARIKH : 2 APRIL 2019 (SELASA)**

**Datuk Tuan Ibrahim bin Tuan Man** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan apakah punca berlakunya kenaikan harga barang dan kos sara hidup rakyat walaupun GST dihapuskan dan digantikan dengan SST?

**JAWAPAN**

**Tuan Yang Dipertua,**

Meskipun GST telah dihapuskan dan digantikan dengan SST, terdapat beberapa **faktor lain** yang turut menyumbang kepada kenaikan harga barang di pasaran, antaranya adalah:

- (i) faktor permintaan dan penawaran;
- (ii) kegiatan manipulasi harga oleh orang tengah;
- (iii) peningkatan kos logistik dan pengangkutan;
- (iv) kejatuhan nilai mata wang Ringgit Malaysia berbanding mata wang utama Dunia;
- (v) peningkatan harga minyak mentah dunia terutamanya petroleum;
- (vi) perubahan cuaca dan bencana alam;
- (vii) kos pengimportan yang tinggi terutamanya bagi bahan makanan;
- (viii) sikap peniaga yang tamak dan mementingkan keuntungan;
- (ix) kegiatan kartel dan monopolii; dan
- (x) peningkatan kos pengeluaran.

**PEMBERITAHUAN PERTANYAAN LISAN DEWAN RAKYAT**

**PERTANYAAN :** LISAN

**DARIPADA :** Tuan Chan Ming Kai [ALOR SETAR]

**TARIKH :** 2 APRIL 2019

**SOALAN :** NO. 60 [(PM.22(5)]

**Tuan Chan Ming Kai [ Alor Setar ]** minta **PERDANA MENTERI** menyatakan siapa ahli lembaga terkini serta elaun bagi 7 badan berkanun, 9 organisasi di bawah Akta Syarikat dan 3 yayasan yang berada di bawah Jabatan Perdana Menteri.

**JAWAPAN:** YB DATUK WIRA DR. MD FARID BIN MD RAFIK  
MENTERI DI JABATAN PERDANA MENTERI

Tuan Yang Di Pertua,

Sehingga 11 Mac 2019, terdapat enam (6) badan berkanun, 7 organisasi di bawah Akta Syarikat dan satu (1) Yayasan yang berada di bawah Jabatan Perdana Menteri.

Elaun yang diperuntukkan kepada Ahli Lembaga Pengarah adalah berdasarkan kepada kepakaran masing-masing.

Sekian. Terima kasih.

**PEMBERITAHUAN PERTANYAAN LISAN DEWAN RAKYAT**

---

**PERTANYAAN : LISAN**

**DARIPADA : DATUK SERI PANGLIMA DR. MAXIMUS  
JOHNITY ONGKILI [ KOTA MARUDU ]**

**TARIKH : 2.4.2019 (SELASA)**

**SOALAN NO. 61**

**Datuk Seri Panglima Dr. Maximus Johnity Ongkili [ Kota Marudu ]** minta **MENTERI PENDIDIKAN** menyatakan adakah Kementerian bercadang menetapkan pembelajaran dan pengajian Bahasa Kadazandusun di peringkat sekolah diletakkan di bawah dasar "Pupils' Own Language" (POL). Bilakah ketetapan ini akan dilaksanakan.

**JAWAPAN**

Tuan Yang di-Pertua,

Kementerian Pendidikan Malaysia (KPM) telah mengangkat mata pelajaran Kadazandusun sebagai **Mata Pelajaran Tambahan (Bahasa Ibunda)** dan bukannya diletak di bawah dasar "**Pupils Own Language**" (**POL**). Mata pelajaran tambahan ini dipelajari di sekolah rendah daripada Tahun 1 hingga Tahun 6 dan di sekolah menengah rendah untuk Tingkatan 1, Tingkatan 2 dan Tingkatan 3. Pada peringkat menengah atas daripada Tingkatan 4 dan Tingkatan 5, mata pelajaran Bahasa Kadazandusun dipelajari sebagai **Mata Pelajaran Elektif Bahasa**.

Kurikulum mata pelajaran Bahasa Kadazandusun telah dilaksanakan sejak tahun 1998. Bagi memastikan pelaksanaannya berjalan dengan lancar, buku teks disediakan sebagai bahan sokongan pembelajaran dan guru juga turut dilatih mengikuti latihan di Institut Pendidikan Guru (IPGM) Kampus Kent dan IPG Kampus Keningau.

Sekian, terima kasih

RJM 113

**SOALAN NO. 62**

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : DATO' NGEH KOO HAM [BERUAS]**

**TARIKH : 2 APRIL 2019 (SELASA)**

**SOALAN NO.62**

**Dato' Ngeh Koo Ham** minta **MENTERI AIR, TANAH DAN SUMBER ASLI** menyatakan mengapa pihak pemaju perlu membuat sumbangan kewangan kepada **Indah Water Konsortium (IWK)** semasa memajukan sesuatu projek padahal IWK mengutip bayaran daripada pemilik premis.

## **SOALAN NO. 62**

### **JAWAPAN**

Tuan Yang di-Pertua,

1. Sebenarnya, sumbangan kewangan yang dibuat oleh pihak pemaju adalah kepada pihak Suruhanjaya Perkhidmatan Air Negara (SPAN) di bawah Kumpulan Wang Sumbangan Modal Pembetungan (KWSMP) dan bukanlah kepada Indah Water Konsortium Sdn. Bhd.
  
2. Ingin dijelaskan bahawa sebagai Agensi Perakuan Pembetungan (APP) yang dilantik SPAN, salah satu tugas IWK ialah untuk mengutip bayaran KWSMP daripada pemaju yang kemudiannya akan disalurkan kepada SPAN. Ini seolah-olah memberi gambaran bahawa IWK yang mengutip bayaran daripada pemaju.

Sekian, terima kasih.

## **PEMBERITAHUAN PERTANYAAN LISAN DEWAN RAKYAT**

**PERTANYAAN :** **LISAN**

**DARIPADA :** **PUAN HAJAH SITI ZAILAH BINTI MOHD YUSOFF [ RANTAU PANJANG ]**

**TARIKH :** **2 APRIL 2019 | SELASA**

### **SOALAN :**

**Puan Hajah Siti Zailah binti Mohd Yusoff [ Rantau Panjang ]** minta **PERDANA MENTERI** menyatakan apakah Tabung Haji tidak akan menanggung lagi subsidi bagi Jemaah Haji kali pertama yang diluluskan rayuan mereka.

### **JAWAPAN : (MENTERI DI JABATAN PERDANA MENTERI )**

Tuan Yang Dipertua,

Untuk makluman, semua jemaah haji muassasah yang menunaikan haji kali pertama layak untuk menerima bantuan subsidi daripada Tabung Haji, termasuk pengiring dan mereka yang merayu bagi tahun ini.

Keputusan ini telah dimuktamadkan dan diumumkan pada 28 Februari 2019 selepas mengambilkira pelbagai aspek termasuk keupayaan dan kedudukan unjuran kewangan Tabung Haji bagi tahun 2019.

Sehubungan itu, Bayaran Haji bagi jemaah haji Muassasah yang layak menerima subsidi seperti di atas untuk Musim Haji 1440 Hijrah adalah RM9,980.

Sekian. Terima kasih.

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : DATO' SRI HAJI FADILLAH BIN YUSOF  
[ PETRAJAYA ]**

**TARIKH : 2 APRIL 2019 [ SELASA ]**

**SOALAN NO. 64**

Minta **MENTERI PERUMAHAN DAN KERAJAAN TEMPATAN** menyatakan berapakah jumlah projek perumahan rakyat yang akan dibina pada tahun ini terutamanya di Sarawak. Dan di manakah lokasi projek ini akan dilaksanakan.

**JAWAPAN**

Tuan Yang di-Pertua,

1. Untuk makluman Yang Berhormat, bagi Negeri Sarawak, sebanyak 8 projek (4110 unit) Program Perumahan Rakyat (PPR) telah siap dibina, manakala 3 projek (832 unit) PPR sedang dalam pembinaan iaitu di Tabuan Melayu, Jalan Landeh dan Petrajaya, Kuching.
2. Untuk makluman Yang Berhormat juga, 2 projek (961 unit) PPR masih dalam peringkat perancangan iaitu di Matang, Kuching dan Seduan, Sibu yang dijangkakan akan dilaksanakan dalam tahun 2019.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : DATO' TAKIYUDDIN BIN HASSAN  
[ KOTA BHARU ]**

**TARIKH : 2 APRIL 2019 [ SELASA ]**

**SOALAN NO. 65**

Minta **MENTERI PERUMAHAN DAN KERAJAAN TEMPATAN** menyatakan fokus utama pembentukan Dasar Komuniti Negara terutamanya daripada aspek keselamatan penduduk dan kawasan kejiranan.

**JAWAPAN**

Tuan Yang di-Pertua,

1. Untuk makluman Yang Berhormat, Dasar Komuniti Negara (DKN) ialah inisiatif Kerajaan untuk mendayaupayakan komuniti setempat supaya mereka boleh melibatkan diri secara aktif bagi mewujudkan persekitaran berkualiti, memperkasa aktiviti komuniti untuk pengurusan dan penyelenggaraan harta awam dan harta bersama demi mencapai kesejahteraan hidup. Antara objektif Dasar Komuniti Negara ialah untuk membentuk komuniti yang peka terhadap isu-isu komuniti, saling menghormati, menyayangi dan bekerjasama antara jiran tetangga. Pelbagai program telah dilaksanakan oleh Kementerian Perumahan dan Kerajaan Tempatan (KPKT) melalui Pejabat Sekretariat Muafakat Komuniti (Pejabat SMK) bagi mendidik masyarakat dalam aspek pengukuhan komuniti setempat. Terdapat 8 kluster di bawah DKN di mana kluster 3 yang memberi fokus kepada isu Keselamatan. 3 strategi digariskan di bawah Kluster 3 iaitu:

- **Strategi 3.1:**

Memastikan persekitaran hidup yang selamat dan terjamin.

- **Strategi 3.2:**

Meningkatkan kesedaran dan pengetahuan berkaitan aspek keselamatan.

- **Strategi 3.3:**

Memperkuuh jalinan kerjasama sosial antara komuniti dengan pihak berkaitan dalam usaha memastikan isu keselamatan diberi keutamaan.

2. Di bawah Strategi 3.1, perkara yang diliputi adalah berkenaan isu persekitaran hidup masyarakat seperti penyelenggaraan bangunan, harta bersama dan amalan *crime prevention through environment design* (CPTED). Keadaan bangunan dan persekitaran yang selamat mampu mencegah perkara yang tidak diingini seperti kemalangan di samping mengelak daripada berlakunya ancaman jenayah.

3. Di bawah Strategi 3.2 pula menekankan kesedaran dan pengetahuan komuniti berkenaan aspek keselamatan. Inisiatif yang dilaksanakan bagi memupuk kesedaran dan pengetahuan dalam kalangan komuniti meliputi keselamatan kebakaran, pencegahan jenayah dan juga keselamatan aktiviti air.

4. Manakala di bawah Strategi 3.3 berkait rapat dengan pengukuhan jalinan kerjasama sosial antara komuniti dengan pihak berkaitan daripada aspek keselamatan. Pejabat Sekretariat Muafakat Komuniti (Pejabat SMK) bekerjasama dengan Kawasan Rukun Tetangga (KRT) bagi melaksanakan aktiviti Skim Rondaan Sukarelawan (SRS) untuk meningkatkan tahap keselamatan penduduk. Pejabat SMK juga bekerjasama dengan agensi keselamatan seperti Jabatan Bomba dan Penyelamat Malaysia (JBPM) dan Polis Diraja Malaysia (PDRM) untuk

mengadakan program-program keselamatan dalam kalangan komuniti seperti Bomba Komuniti.

5. Selain itu, antara program khusus yang telah dilaksanakan bersama komuniti ialah Program Anakmu Anakku yang memberi pendedahan kepada golongan ibu berkaitan penjagaan anak yang sempurna dan selamat.

6. Strategi dan program yang telah disusun oleh Kementerian Perumahan dan Kerajaan Tempatan (KPKT) bersama komuniti diyakini mampu meningkatkan keselamatan penduduk dan seterusnya menjamin kesejahteraan komuniti.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : Y.B. DATUK AARON AGO DAGANG  
[ KANOWIT ]**

**TARIKH : 2 APRIL 2019 (SELASA)**

**SOALAN NO. 66**

Minta **MENTERI HAL EHWAL EKONOMI** menyatakan sebab sebenar di mana 7 daripada daerah termiskin di Malaysia adalah di Sarawak. Apakah kaedah dan kriteria yang digunakan dalam kajian kemiskinan tersebut.

**JAWAPAN**

Yang di-Pertua,

1. Untuk makluman Yang Berhormat, sejumlah 7 dari 13 daerah termiskin yang dimaksudkan di Negeri Sarawak adalah dikenalpasti melalui Penyiasatan Pendapatan Isi Rumah dan Kemudahan Asas 2016 (PPIR&KA 2016) yang telah dijalankan oleh Jabatan Perangkaan Malaysia (DOSM). Tujuan penyiasatan ini adalah untuk mengumpul maklumat berkaitan ciri-ciri isi rumah Malaysia yang melibatkan pendapatan isi rumah dan kemudahan asas. Hasil penyiasatan mendapati bahawa purata pendapatan bulanan isi rumah bagi daerah berkenaan adalah di bawah RM4,000.
2. Kaedah temu ramah bersemuka telah digunakan dalam Penyiasatan yang dijalankan bermula Mei 2016 sehingga April 2017. Penyiasatan ini dijalankan menggunakan pensampelan berkebarangkalian yang mewakili semua isi rumah warganegara Malaysia melibatkan 83,000 isi rumah sepanjang tempoh penyiasatan. Berdasarkan maklumat yang diperolehi melalui PPIR&KA ini, isi rumah yang berpendapatan rendah daripada Pendapatan Garis Kemiskinan (PGK) telah dikenalpasti dan membolehkan Kerajaan mengenalpasti peratus insiden kemiskinan mengikut daerah. Untuk makluman Ahli Yang Berhormat, PGK bagi negeri Sarawak adalah RM1,020.
3. Secara umumnya, antara sebab kemiskinan di Malaysia termasuk di Sarawak adalah kerana majoriti ketua isi rumah mempunyai tahap pendidikan dan kemahiran yang rendah. Kebanyakan isi rumah pula bekerja sendiri, pekerja berpendapatan rendah dan terlibat dalam perniagaan berskala kecil. Di samping itu, kebanyakan isi rumah mempunyai satu sumber pendapatan, tabungan rendah, tidak mempunyai perlindungan insurans,

menjadikan mereka mudah terjejas dengan ketidaktentuan dan kejutan.

4. Jurang pembangunan antara wilayah, negeri serta bandar dan luar bandar juga menyumbang kepada ketidaksamarataan pembangunan dan pendapatan. Pembangunan infrastruktur dan amneti asas di luar bandar terutama di kawasan terpencil Sarawak terus menjadi halangan disebabkan oleh kawasan yang luas dan taburan penduduk yang berselerak. Kos pelaksanaan yang tinggi, akses yang kurang baik dan keadaan muka bumi memberikan cabaran untuk meningkatkan akses di luar bandar.
5. Sehubungan itu, sejajar dengan pelaksanaan pembangunan inklusif yang merangkumi semua rakyat tanpa mengira jantina, kaum dan lokasi, Kerajaan akan meletakkan keutamaan pelaksanaan strategi dan inisiatif di daerah-daerah termiskin tersebut yang akan menumpukan program/projek yang berbentuk pembangunan fizikal, ekonomi dan modal insan. Ini dijangka dapat meningkatkan pendapatan purata bulanan isi rumah mereka sekaligus mengurangkan jurang pembangunan daerah tersebut demi meningkatkan kemakmuran dan kesejahteraan rakyat.

Sekian, terima kasih.

Kementerian Hal Ehwal Ekonomi

2 April 2019

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : YB TUAN CHE ALIAS BIIN HAMID  
[KEMAMAN]**

**TARIKH : 2 APRIL 2019**

**SOALAN : 67**

**YB TUAN CHE ALIAS BIIN HAMID [ KEMAMAN]** minta **PERDANA MENTERI** menyatakan justifikasi keputusan kontroversi Peguam Negara menarik balik kes pendakwaan terhadap Siti Kassim.

**JAWAPAN :** **YB TUAN MOHAMED HANIPA MAIDIN**  
**TIMBALAN MENTERI DI**  
**JABATAN PERDANA MENTERI**

Pada menjalankan budi bicara yang termaktub dalam Perkara 145 Perlembagaan Persekutuan, tiada peruntukan undang-undang yang menghendaki Peguam Negara untuk memberi justifikasi bagi sebarang keputusan sama ada untuk mendakwa atau gugurkan pendakwaan yang telah dimulakan.

**PEMBERITAHUAN PERTANYAAN JAWAB LISAN DEWAN RAKYAT**

**PERTANYAAN : JAWAB LISAN**

**DARIPADA : TUAN RAMLI BIN MOHD NOR [ CAMERON HIGHLANDS ]**

**TARIKH : 2 APRIL 2019**

**SOALAN : 68**

**Tuan Ramli bin Mohd Nor [ Cameron Highlands ] minta MENTERI DALAM NEGERI menyatakan benarkah Akta A1549 iaitu Akta Pencegahan Jenayah (PINDAAN) 2017 bakal dihapuskan.**

**JAWAPAN**

Tuan Yang di-Pertua,

Kementerian Dalam Negeri (KDN) telah menubuhkan Jawatankuasa Khas Kajian Undang-Undang dan Jawatankuasa Teknikal bagi mengkaji kesemua enam (6) akta yang berada di bawah bidang kuasa KDN termasuklah Akta Pencegahan Jenayah 1959 (POCA).

Selain jabatan kerajaan seperti Jabatan Peguam Negara dan Polis Diraja Malaysia (PDRM), kedua-dua jawatankuasa ini turut dianggotai oleh wakil Badan Peguam Malaysia, Suruhanjaya Hak Asasi Manusia (SUHAKAM), pengamal undang-undang dan ahli akademik.

Melalui beberapa siri mesyuarat dan bengkel yang telah diadakan, ahli kedua-dua jawatankuasa berkenaan telah membangkitkan pelbagai isu dan pandangan berkenaan akta-akta tersebut seperti tempoh tahanan, kuasa polis dan ruang untuk semakan kehakiman (*judicial review*).

## **SOALAN NO : 68**

Buat masa ini KDN sedang meneliti kesemua isu dan pandangan yang dikemukakan oleh kedua-dua jawatankuasa tersebut. Seterusnya KDN akan mengemukakan syor berkenaan undang-undang berkenaan kepada Jemaah Menteri untuk diputuskan.

Keputusan untuk meminda atau memansuhkan sesuatu undang-undang perlu dibuat dengan teliti dan dikaji dengan mendalam supaya kepentingan keselamatan negara tidak terjejas dan pada masa yang sama, semua keperluan hak asasi manusia tidak dibelakangkan

**PEMBERITAHUAN PERTANYAAN LISAN DEWAN RAKYAT**

---

**PERTANYAAN**

**: JAWAB LISAN**

**DARIPADA**

**: TUAN YUSUF BIN ABD. WAHAB  
[ TANJONG MANIS ]**

**TARIKH**

**: 2.4.2019 (SELASA)**

**SOALAN**

**: 69**

minta **MENTERI PEMBANGUNAN LUAR BANDAR** menyatakan untuk mengkaji semula keputusan untuk tidak membina jalan penghubung di kawasan Paloh, Kedang, Berangan, Stalun, Mupong dan Bukit Kinyau. Kawasan-kawasan ini sangat memerlukan kemudahan asas ini untuk meningkatkan taraf sosioekonomi dan untuk kes-kes kecemasan.

**JAWAPAN**

Tuan Yang di-Pertua,

Untuk makluman Yang Berhormat, cadangan jalan penghubung di kawasan Paloh, Kedang, Berangan, Stalun, Mupong dan Bukit Kinyau tidak tersenarai di dalam Senarai Keutamaan Kerajaan Negeri yang telah diterima oleh Kementerian.

Namun begitu, sekiranya terdapat keperluan mendesak, dipohon Yang Berhormat untuk mengemukakan keperluan tersebut kepada Kerajaan Negeri sebagai senarai keutamaan dan pihak Kementerian akan meminta Jabatan Kerja Raya (JKR) dan Pejabat KPLB Sarawak untuk menjalankan siasatan tapak dan semakan kos sebelum dikemukakan kepada pihak Unit Perancang Ekonomi, Kementerian Hal Ehwal Ekonomi (UPE, MEA), untuk dilaksanakan di bawah Rancangan Malaysia Kesebelas (RMKe-11), Rolling Plan akan datang. Walau bagaimanapun, pelaksanaan projek ini adalah tertakluk kepada kelulusan oleh pihak UPE, MEA dan kedudukan semasa kewangan kerajaan.

**MESYUARAT PERTAMA, PENGGAL KEDUA  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

**PERTANYAAN :** LISAN  
**DARIPADA :** YB DATUK SYED ABU HUSSIN BIN HAFIZ SYED  
**KAWASAN :** ABDUL FASAL  
**TARIKH :** BUKIT GANTANG  
**02 APRIL 2019 (SELASA)**

**SOALAN :**

**YB DATUK SYED ABU HUSSIN BIN HAFIZ SYED ABDUL FASAL** minta **MENTERI KERJA RAYA** menyatakan apakah status pengambil alihan tanah milik persendirian bagi Paket 4A : CH 35900 – CH 44675 (8.775 km), Paket 4B : CH 44675 – CH 57300 (12.625 km) dan Paket 5 : CH 57300 – CH 67368 (10.068 km) dalam memastikan pembangunan dan projek naik taraf laluan FT60 dari Damar Laut ke Changkat Jering tidak tertangguh begitu lama. Seterusnya bilakah atau jangkaan projek Lebuh Raya Pantai Barat (Banting Ke Changkat Jering, Taiping) dapat disiapkan sepenuhnya.

**JAWAPAN :**

Tuan Yang Di-Pertua,

Untuk makluman Ahli Yang Berhormat, tiada proses pengambilan tanah yang dibuat bagi Pakej 4A , Pakej 4B dan Pakej 5 kerana tiada kelulusan peruntukan pelaksanaan pembinaan bagi pakej-pakej tersebut.

Manakala bagi status terkini projek Lebuh Raya Pesisiran Pantai Barat (Banting Ke Changkat Jering, Taiping) sehingga 15 Februari 2019 pula telah mencapai kemajuan 58%. Aktiviti pembinaan lebuh raya kini sedang giat dilaksanakan yang melibatkan seperti kerja- kerja pembersihan tanah, penambakan tanah, pembinaan struktur jambatan, penurapan jalan dan pemasangan perabot jalan. Lebuhraya WCE ini dijangka akan siap secara berperingkat bermula pada tahun 2019 dan dijangka siap sepenuhnya pada tahun 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT**

**PERTANYAAN : LISAN**

**DARIPADA : DATO' SRI RICHARD RIOT ANAK JAEM  
[ SERIAN ]**

**TARIKH : 2 APRIL 2019 (SELASA)**

**SOALAN NO. 71**

Minta **MENTERI KESIHATAN** menyatakan bilakah projek pembinaan Klinik Kesihatan Kelas III Serian akan dimulakan sedangkan tapak tanah telahpun disediakan.

**JAWAPAN**

**Yang di-Pertua,**

Kementerian Kesihatan Malaysia sentiasa berusaha menambahbaik capaian sistem perkhidmatan kesihatan demi kesejahteraan rakyat Malaysia terutamanya penduduk Sarawak.

Projek Klinik Kesihatan (Jenis 3) Serian telah diluluskan oleh Unit Perancang Ekonomi, Kementerian Hal Ehwal Ekonomi (EPU, MEA) untuk dilaksanakan di bawah Rancangan Malaysia Kesepuluh (RMKe-10) tahun 2015 dengan anggaran kos RM30 juta. Projek ini dilaksanakan secara Tender Terbuka oleh Jabatan Kerja Raya Sarawak (JKRS). Projek ini dijangka akan ditender pada bulan Mac 2019 dengan Tarikh Jangka Surat Setuju Terima (SST) adalah pada Ogos 2019. Tempoh pembinaan dijangka mengambil masa 24 bulan.

Kementerian ini bersama Jabatan Kerja Raya dan Agensi-agensi Kerajaan yang lain sentiasa bekerjasama dengan erat bagi memastikan projek ini berjalan dengan lancar. Adalah menjadi aspirasi Kementerian ini agar projek-projek ini disiapkan pada masa, kos dan standard yang telah ditetapkan. Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KEDUA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN AHMAD JOHNIE BIN ZAWAWI  
[IGAN]**

**TARIKH : 2 APRIL 2019 (RABU)**

**SOALAN NO. 72**

Minta **MENTERI HAL EHWAL EKONOMI** menyatakan bilakah tempoh perjanjian di antara FELCRA dan pekebun-pekebun kecil kelapa sawit di kawasan Parlimen P.207 Igan akan tamat, apakah perancangan pihak FELCRA seterusnya selepas tamat tempoh tersebut.

**JAWAPAN**

Yang di-Pertua,

1. Bahawa terdapat 6 buah projek FELCRA terletak di dalam Parlimen P.207 Igan, Sarawak iaitu Projek FELCRA Igan 1 hingga Projek FELCRA Igan 6. Dimaklumkan juga bahawa tempoh tamat perjanjian bagi kesemua keenam-enam projek berkenaan adalah 30 tahun iaitu mengikut tempoh satu pusingan ekonomik pokok. Kelazimannya, setelah tamat tempoh perjanjian, akan diikuti dengan program tanam semula. Namun begitu, bagi projek Igan 1 hingga 6 masih belum lagi sampai tempoh untuk tanam semula kerana usia pokok masih di dalam lingkungan di antara 10 hingga 21 tahun.

Sekian, terima kasih.

Kementerian Hal Ehwal Ekonomi  
2 April 2019

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KEDUA  
PARLIMEN KEEMPAT BELAS**

**PERTANYAAN : JAWAB LISAN**

**DARIPADA : DATO' DR. HAJI NOOR AZMI BIN GHAZALI  
[ BAGAN SERAI ]**

**TARIKH : 2 APRIL 2019 (SELASA)**

**SOALAN NO. 73**

Minta **MENTERI PENGANGKUTAN** menyatakan adakah cadangan untuk mewujudkan lapangan terbang di Parlimen Bagan Serai dalam daerah Kerian Perak untuk menampung aktiviti Lapangan Terbang Pulau Pinang yang sangat padat demi meningkatkan kemajuan ekonomi Malaysia utara akan dilaksanakan oleh Kerajaan Pakatan Harapan.

**JAWAPAN**

Yang DiPertua,

1. Untuk makluman Yang Berhormat, buat masa ini Kerajaan tidak mempunyai sebarang perancangan untuk membina sebuah Lapangan Terbang baharu di Bagan Serai, Perak. Kerajaan juga tidak pernah menerima sebarang cadangan untuk pembangunan lapangan terbang tersebut.
  
2. Kerajaan mengambil pendekatan bersifat terbuka dalam sebarang cadangan daripada Kerajaan Negeri mahupun syarikat swasta untuk membantu merancakkan ekonomi negara termasuk cadangan untuk membina lapangan terbang baharu di Bagan Serai. Pendirian Kerajaan adalah untuk menyokong pertumbuhan industri pelancongan di Perak. Sehubungan itu, adalah wajar sebarang cadangan berhubung pembinaan lapangan terbang ini dikemukakan kepada Kementerian Pengangkutan untuk pertimbangan selanjutnya.

Sekian, terima kasih.